

Ekwo

Nehemaya

1 ¹Ọwaa bu opfu Nehemaya nwa Hakalaya.

Nehemaya vutaru ivu ẹhu Jierúsalemu

L'ona Kisilewu l'apha k'ukporo ẹ mu no ẹ Susa, bu ishi mkpukpu; ²be Hanani, bu onye lanu l'ime unwune mu yele unwoke ozo tukoru shi l'ali Jiu bya. Mu ja phe aji ndu Jiuda, phoduru nu; mbu ndu ono, shi l'ali, e shi kpuru phe ẹ ndzu laa; laphu azu ono. Mu bya ajikwaa phe pho aji Jierúsalemu. ³Ephe su mu ẹ-a: “Ndu ono, e shi kpua ẹ ndzu laa ali ozo; ephe mechaa laphu azu l'ali ndu Jiuda ono be onodu phe dukwa eji shii; mbu l'onodu phe be iphere iya dukwa. Igbulo Jierúsalemu be e nwukpo-shichaaru enwukposhi; teme onu-abata iya be oku tsukotaru.”

⁴Mu numachaa iphe ono, ephe pfuru ono; mu no-zeta anoo wata ara ekwa.

Mu noo ujiku olemole gukota aphu; aswi ẹgu epfu anu Chileke k'imigwe. ⁵Iphe, mu pfuru bu: “Gube Chipfu, bu Chileke k'imigwe; mbu Chileke ono, paru ẹka bya adu ebvu ono; onye ono, edobeje ogbandzu iya l'ehu ndu yeru iya obu bya eme iphe, o pfuru; teme o nodu egoshije phe ẹ ya yeru phe obu. ⁶Ngabenu nchi; le mu enya; numa epfufu, mube onye-ozu ngu epfu anu ngu; mbu epfufu, mu anoduje l'iphu ngu epfu anu ngu eswe lenyashi l'iswi ẹhu ndu-ozu ngu, bu ndu Izurelu. Mu epfufuta iphe-aji, anyibe ndu Izurelu megbaberu ngu; mbu iphe-aji, mbedua me ndibe nna mu phe meru ngu. ⁷Anyi mewaru ngu ejo-iphe, ha shii; mbu l'anyi pawaru eme ekemu ono, i turu ono haa; bya ahaa eme iphe, i toru okpa iya su ge meje; me eme omelali, i doberu, bu iya bu iphe, i turu lekemu nu onye-ozu ngu, bu Mosisu. ⁸Nyatanu opfu ono, i pfuru onye-ozu ngu, bu Mosisu su: ‘O -buru l'e te egudedu ire unu ẹka be mu a-tukashikwa unu nanu nanu l'echilabo ohamoha. ⁹Ole o -buru l'unu dakoberu lwapfuta mu; bya edobe ekemu mu; eme iya ememe; o betakpo ẹka a chiru unu laa buru l'ohu ẹka igwe beru ali beru; be mu e-shi l'eka ono rwukobe unu; duphuta unu azu l'eka ono, mu hotaru go buru ẹka mu e-buru eburu ono.’

¹⁰“Oo ndu-ozì ngu bẹ ẹphẹ bụ; bya abụru ndibe ngu; mbụ ndu i gude eze ike ngu; mẹ ọkpehu ngu gbafuta. ¹¹Gùbe Nnajiuphu; ngabenu nchi l'epfufu, onye-ozì ngu epfu anụ ngu; mẹ l'epfufu, ndu-ozì ngu epfu anụ-kwa ngu pho; mbụ ndu ono, bụ ndu ọduje ree g'ẹphẹ tsụ ngu ebvu ono. Jiko menaa g'iphe jeeru mụbe onye-ozì ngu lẹ ree ntanụ-a; mbụ g'i mee g'imemini mu dụ nwoke-a, bụ eze.”

Teke ono bẹ bụ mu shi bụru onye agbajeru eze mee.

Aaha Nehemaya g'o je Jierúsalemụ

2 ¹O be l'ọnwa Nisanu l'apha, kwe Atakuzakuzesu ụkporo apha, ọ wataru aburu eze; g'a pataru iya mee; mu pata mee ono; gbaa haaru eze. Ophu o toko dụ-swee teke mu gbanwubejeru iphu l'iphu eze. ²Eze jia mu sụ: “?Bụ gunu meru iphe idzu iphu l'ẹbe abụ iphe-ememe eme ngu? O to nwedu iphe ọzo gbahaa l'obu ta atsodu ngu uto.”

Teke ono; ndzụ wata mu agushi ike. ³Mu bya asụ eze: “Gẹ gube eze ndudukwa ndzụ jasuru asuru. ?Bụ kẹ gunu bẹ mu ta anodudu adzụ iphu; lẹ mụbe onye mkpukpu mu dakposihuru adakposihuru; mbụ ẹka ono, e liru nna mu oche pẹ; teme oguzo iya bụru iphe, ọku tsukotaru?” ⁴Tobudu iya bụ; eze sụ mu: “?Bụ gunu bẹ ọ dụ ngu gẹ mu meeru ngu?”

Mu bya atakpeeru Chileke k'imigwe opfu; ⁵bya asụ eze: “O -buru l'ọ dụ gube eze ree; mbụ ọ -buru lẹ mụbe nwozi ngu dụ ngu l'obu; hanaa mu gẹ mu jeshia alị Jiuda; je lẹ mkpukpu ono, e liru nna mu oche pẹ ono; je akpukwaa ya.”

⁶Eze yele eze-nwanyị, bụ onye nọ-kube iya nụ jia mu sụ: “?Denu g'ii-nọ-beru l'ije ngu obu? ?Bụ teke ole bẹ ii-lwa?” O dụ eze ree gẹ mu je; mu bya ataru iya onu.

⁷Mu pfukwaarupho eze sụ iya: “O -buru l'ọ dụ gube eze ree; denuru ekwo-ozì nụ mu gẹ mu nụ ndu bụ ọchi-ọha l'azụ enyimu; k'ophu ẹphẹ a-ha mu gẹ mu ghata jeshia alị ndu Jiuda. ⁸Dekwaapho ekwo-ozì ophu mu a-nụ Asafu, bụ onye eleta ọswa eze ọnya; g'ọ nụ mu oshi, mu e-gude mee mgbo onu-abata ọlo-mgbobuta eze-ọlo Chileke; mẹ oshi, mu e-gude mezia igbulọ mkpukpu ono; mẹ ophu mu e-gude mee ọlo, mu e-buru.” Iphemiphe, mu rworu eze bẹ o mekotaru mu; kele ẹka-oma kẹ Chileke mu bẹ dụ mu l'ehu.

Nehemaya agbaphe igbulọ Jierúsalemụ

⁹Mu bya ejerwua azụ enyimu; mu bya eworu ekwo-ozì ono, eze deru ono nụ ndu ọchi-ọha ono. Eze bẹ duwaru ndu-ishi ndu ojogu; waa ndu agba l'inya yeru mu gẹ mu l'ephe swiru. ¹⁰Teke Sambalatu, bụ onye Horonu; mẹ Tobaya, bụ onye-ishi l'alị Amonu numaerupho l'ọ nweru onye byaru achọ g'ee-shi g'iphe duru ndu Izurelu lẹ ree; ọ dụ pẹ eji dushia pẹ iya ike.

¹¹Noo ya; mu bya abata lẹ Jierúsalemu; nọo ya abali ẹto. ¹²O be l'enyashi ujiku lanu; mu gbalihu; mu l'unwoke olemole; anyi tugbua. Ophu o dudu onye mu pfuwaru iphe, Chileke mu yeru mu l'obu ge mu meeru Jierúsalemu. Ophu o dukwapho anu-agbagba ozo, mu gude ghahaepho ophu mu l'agba. ¹³O buru l'echi abali be mu gude tugbua. Eka mu shiru bu Onu-abata Nsuda lufuta lẹ Welu Nkuta-oswa; shia ono futa lẹ Onu-abata Ikpọzu; ejekpọepho agbaphe igbulọ Jierúsalemu ono, e tsukpọshiru etsukpọshi ono; yele oguzo iya ono, oku tsukotaru ono. ¹⁴Mu bya eshi l'eka ono tugbua shia uzo Onu-abata Enya-nwobvu; waa Okpuru Eze; ole anu, mu agba agbagba te nwedu eka oo-shi ghata. ¹⁵Tobudu iya bu; mu gude enyashi ono tugbua kwaseru uzo nsuda; agbaphe igbulọ ono. Mu gbphechaa ya; bya alwaphuta azu shia Onu-abata Nsuda bahu l'ime mkpukpu. ¹⁶Ophu ndu-ishi amadu eka mu jeru; ozo iphe, mu meru; kele o toko dudu iphe, mu pfuwaru ndu Jiu; me ndu-uke Chileke; me ndu a maru epha phe; me ndu-ishi; mewaro ndu ozo, bu ndu e-mechaa eje ozi ono.

Nehemaya epfu lẹ ya a-kpukwa igbulọ Jierúsalemu

¹⁷Tobudu iya bu; mu su phe: "Unu humawaru egube iphe-otsulehu, anyi no l'ime iya; mbu ge Jierúsalemu gude dakposhihu; oku tsukota oguzo iya. Unu byakwa g'anyi kpukwaa igbulọ Jierúsalemu; k'ophu anyi e-mefu onwanyi iphe-iphere l'ehu." ¹⁸Mu bya epfukwaaru phe pho g'ekama ke Chileke mu gude du-be mu l'ehu; waa k'iphe, eze pfukotaru mu. Epe su: "Ngwa; g'anyi wata iya akpukpu." Epe kwakobeahaa eka k'awata eguru ozi ono.

¹⁹Sambalatu, bu onye Horonu; yele Tobaya, bu onye-ishi l'ali Amonu; me Geshemu, bu onye Arabu numaeppo iphe ono, anyi chiru idzu iya k'ememe ono; epe chiahaa anyi ochi jaaha anyi ewenu asuje: "Bu gunu be unu eme nno? Bu ike be unu ekwefuru eze to?"

²⁰Mu bya eyeeru phe onu su phe: "O kwa Chileke k'imigwe be e-me g'anyi mee iphe, anyi eme mekota. Anyibe ndu-ozi iya abya awata akpu igbulọ obu; ole unubedua te nwedu oke lẹ Jierúsalemu; ophu eka unu adudu iya; ophu ndiche unu ebujeduru iya."

Aakpukwa igbulọ Jierúsalemu

3 ¹No iya; Eliyashibu, bu onye-ishi uke Chileke; yele ndu ozo, bu ndu-uke Chileke bya agbeshi je atuko kpukwaa Onu-abata Aturu. Epe kpuchaa ya; bya eyeshia ya mgbo. Epe kpuru igbulọ iya o futa l'ulo-ephekerephe "Ukporo-ise" me lẹ Ulo-ephekerephe "Hananelu." Epe mechaa ya bya eworu iya ye Chileke l'eka.

²Eka ophu etsota eka ono be bu unwoke mkpukpu Jieriko be kpuru iya nu.

Zaku nwa Imuri kpa tsota phe.

³ Ụnwu Hasena bu p̄he kp̄uru Ọnu-abata Ẹma. Ẹp̄he gbaru iya oshi l'eli iya; yeshia ya mgbo; m̄e ip̄he, eegudeje asw̄o-chi iya asw̄o-chi; m̄e mgb̄orígwè.

⁴ Onye kp̄u-tsotaru p̄he n̄u bu Meremotu nwa Uráya, mb̄u nwanwa Hakozu.

Meshulamu nwa Berekaya, bu nwanwa Meshezab̄elu kp̄uru tsota Meremotu.

Zad̄oku nwa Bana kp̄u-tsota Meshulamu.

⁵ Ndu mkp̄ukpu Tekowa kp̄uru ẹka etsota iya n̄u. Ọle ndu ọphu a maru ẹpha p̄he ẹ mkp̄ukpu ono te ekwedu wozeta onwoph̄e al̄i jee ozi, ndu-ishi-oz̄i ono s̄uru ḡep̄he jee.

⁶ Jioyada nwa Paseya; m̄e Meshulamu nwa Besodeya b̄e kp̄ukwaru Akah̄u Ọnu-abata. Ẹp̄he gbaru iya oshi l'eli iya; yeshia ya mgbo; m̄e ip̄he, e gude asw̄o-chi iya asw̄o-chi; m̄e mgb̄orígwè.

⁷ Ndu kp̄ukwaru ẹka etsota iya n̄u bu Melataya, bu onye Gibiyonu; m̄e Jiadonu, bu onye Meronotu; m̄e unwoke Gibiyonu ȳele Mizupa. Ẹka ono bukota ẹka ndu ọchi-ọha az̄u ẹnyimu bu ishi.

⁸ Onye kp̄ukwaru ẹka etsota iya n̄u bu Uz̄elu nwa Hahaya. Uz̄elu ȳi ẹ ndu akp̄uje ụzu mkp̄ola-ododo.

Onye kp̄uru tsota iya n̄u buru Hananaya. Hananaya b̄e ȳi ẹ ndu emeje man̄u-mbeleke, eshi mkp̄o. Ẹp̄he kp̄uru igbul̄o Jierúsalem̄u ono jas̄u ẹ Igbul̄o-osa.

⁹ Refaya nwa Huru b̄e kp̄u-tsotaru p̄he n̄u. Refaya bu onye-ishi nkeru-ẹbo uswekete Jierúsalem̄u.

¹⁰ Onye kp̄u-tsotaru p̄he n̄u bu Jiedaya nwa Harumafu. Ẹka ọ kp̄ukwaru b̄e bu nhamun̄ha atatip̄hu ibe iya.

Hatushi nwa Hashabuneya kp̄ukwaa ẹka tsotaru iya n̄u.

¹¹ Malukayijia nwa Harimu; m̄e Hashubu nwa Pahatu-Mówa-bu b̄e kp̄ukwaru ẹka igbul̄o ibiya ọzo; bya akp̄ua ụlo-ep̄hekerep̄he, “Ọtapfupfufu-oku.”

¹² Onye kp̄ukwaru ẹka tsotaru iya n̄u bu Shalumu nwa Haloheshi. Ọ bu onye-ishi, nkeru-ẹbo uswekete Jierúsalem̄u. Ọ buru ȳe ụnwada iya t̄ukoru kp̄ua ya.

¹³ Hanunu ȳele ndu bu ẹ mkp̄ukpu Zanowa b̄e kp̄ukwaru Ọnu-abata Ns̄uda. Ẹp̄he kp̄uru iya bya eyeshik̄ota iya mgbo; m̄e ip̄he, egudeje asw̄o-chi iya asw̄o-chi; m̄e mgb̄orígwè; bya akp̄ua igbul̄o ono ẹka d̄u unu nkwo-ẹka lab̄o l'ukporo nkwo-ẹka iri; kp̄ua ya jeye ẹ Ọnu-abata Ikp̄ozu.

¹⁴ Onye kp̄uru Ọnu-abata Ikp̄ozu bu Malukayijia nwa Rekabu, bu onye-ishi uswekete B̄etu-Hakeremu; ọ kp̄uru iya yeshik̄ota iya mgbo; m̄e ip̄he, e gude asw̄o-chi iya asw̄o-chi; m̄e mgb̄orígwè.

¹⁵ Shalumu nwa Kolu-Hoze, bu onye-ishi ndu bu l'uswekete Mizupa b̄e bu iya kp̄ukwaru Ọnu-abata Ẹnya-nwobvu. Ọ kp̄uru iya bya ekpua ya

iphe l'eli; yeshia ya mgbo; me iphe, e gude aswo-chi iya aswo-chi; me mgborígwè. O kpukwakwarupho igbulọ Okpuru Shela, no le mgboru mgbabu eze; kpa ya futa l'eka eeshije le mkpukpu Dévidi agbazeta.

¹⁶Onye kpu-tsotaru iya nu bu Nehemaya nwa Azubuku; onye bu onye-ishi, nkeru-ebo uswekete Betu-Zuru. O kpuru nkiya je akpaa l'iphu ilu Dévidi; kpa ya o futa l'okpuru ono, e gude aka tua ono; wafua l'eka ndu ojobu bu.

¹⁷Ndu kpu-tsotaru iya nu bu ndu Lívayi. Epe no l'eka Rehumu nwa Bani kpa ya.

Onye kpuru tsota iya bu Hashabaya, bu onye-ishi, nkeru-ebo uswekete Keyila.

¹⁸Eka tsotaru iya nu be bu onye kpukwaru iya nu bu Bavayi nwa Henedadu, bu onye-ishi nkeru-ebo uswekete Keyila lanu ophuu; yele unwunna iya.

¹⁹Onye kpuru tsota iya bu Eza nwa Jieshuwa. O kpukwaru ibiya ophu du l'iphu aka eeshije enyiba l'ulo, eedobeje ngwogu; mbu le nkulahu nggoji igbulọ ono. Eza lonwiya be bu onye-ishi, ndu Mizupa.

²⁰Eka tsotaru iya nu be bu Baruku nwa Zabayi be gude g'ophu iya l'ehu kpukwaa ya. O shi le nkuku igbulọ ono kpa ya jeye lonu-oguzo ibe Eliyashibu, bu onye-ishi uke Chileke.

²¹Meremotu nwa Uraya; mbu nwanwa Hakozu be kpuru tsota Zabayi. O shi lonu-oguzo ibe Eliyashibu kpa ya jeye l'eka ibe Eliyashibu jeberu.

²²Ndu ozo, kpu-tsotaru iya nu bu ndu-uke Chileke. Epehedua shigbaa le mkpukpu, no-pheru Jierusalemu mgburugburu.

²³Ndu kpukwaru tsota phe be bu Benjiaminu waa Hashubu. Eka epe kpukwaru bu ataphu ibe phe.

Onye kpuru tsota phe be bu Azariya nwa Maseya; mbu nwanwa Ananaya. Yebedua kpukwaru aka no le mgboru ibe phe.

²⁴Onye kpukwaru ibe iya ozo, tsotaru iya nu be bu Binuyi nwa Henedadu; yebedua kpuru shita l'ibe Azariya jasu le nkuku igbulọ ono.

²⁵Palalu nwa Uzayi be kpukwaru aka du l'iphu nkuku igbulọ ono; yele ulo-ephekerephe ono, sefutaru ishi l'ibe eze l'eka iya ophu du l'uzo imeli mkpukpu ono le mgboru oma aka ndu nche anoje.

Onye kpukwaru tsota iya nu bu Pedaya nwa Paroshi.

²⁶Ndu eje ozi leze-ulo Chileke, bu ndu bu l'ubvu, Ofelu bya akpukwaa nkephe futa l'iphu Onu-Abata-Mini, no l'uzo enyanwu-awawa; yele ulo-ephekerephe ono, sefuru esefu ono.

²⁷Ndu kpu-tsotaru phe nu, kpuru ibiya ozo be bu unwoke ndu Tekowa. Epe kpukwaru iphu oke ulo-ephekerephe ono, sefuru esefu ono; kpa ya jeye o sibe l'igbulọ Ofelu.

²⁸Ndu uke Chileke be kpukwaru a -gbé le Onu-abata Inya kwaseru; onyenonu kpuru ataphu ibe iya.

²⁹Onye kpuru tsota phe nū bē bụ Zadọku nwa Ima. Yēbedua kpukwaru atatiphu ibe iya.

Onye ophu kpuru tsota iya nū buru Shemaya nwa Shekanaya. Yēbedua bụ onye-nche Onu-abata Enyanwu-awawa.

³⁰Ndu ọzo, kpuru tsota iya nū bụ Hananaya nwa Shelemaya; yēle Hanunu, bụ onye k'ishii l'unwu Zalafu.

Meshulamu nwa Berekaya kpuru tsota phe; ẹka ọ kpukwaru bụ atatiphu ụlo iya.

³¹Onye ophu kpuru tsota iya bụ Malukayijia. Yēbedua yī lē ndu akpuje ụzu mkpọla-ododo. Ọ kpukwaru igbulọ nkiya jeye l'ulo ndu eje ozi l'ezelọ Chileke; mē kē ndu ngho l'atatiphu Onu-abata Nlele; ọ kpukwaa ya pho futa lē nwulo, dū l'eli nkuku igbulọ ono.

³²Ndu akpuje ụzu mkpọla-ododo; mē ndu ngho bē kpukwaru mgbaka nwulo ono, dū l'eli nkulahu nggoji igbulọ ono; ephe kpua ya jeye lē Onu-abata Aturu.

Ndu mkposhi ozi ono

4 ¹Sambalatu nūmaepho l'anyi akpukwawaa igbulọ ono; ẹhu-eghu ghuahaa ya; mbu ọ voru oku wua ẹhu wata aja ndu Jiu ewenu. ²Ọ nọdu l'iphu ndibe phe; mē l'iphu ndu ojogu Sameriya pfuahaa su: “?Bụ gunu bē ndu Jiu-a, bụ ndu arwuhu-a eme? ?Ephe eme g'ephe kpukwaa igbulọ ono tọo gunu? Mbū-a; ?ephe e-mechaa gwee ngweja tọo? ?Ephe eme g'ephe kpu-ghee ya l'ujiku lanu tọo? ?Bụ g'ephe a-dū ike mee gē mkpuma ono dūbaa ree ọzo? mbu mkpuma ono, ephe voshiru lē mkpokpo igbulọ ono, oku gbanwushiru ono.”

³Tobaya, bụ onye Amonu, nọ iya lē mgboru su: “Igbulọ mkpuma obu, ephe akpu obu ?o nweru ishi? Iphe, bụ agulo -gbakotakpo ya nū l'ọ dakposhihu!”

⁴“Sū-a; jiko Chileke anyi; ngabenuru anyi nchi; kele ọ tọ dudu iphe, a guberu anyi. Mena g'ewenu, ephe aja anyi tukoru phe l'ishi. Li mee g'a lwuta phe l'ogu lashia ali ọzo. ⁵Ta agukwaru phe nvu l'ejo-iphe, ephe meru; te ehuchafukwa iphe-iji phe l'iphu ngu; kele ephe gudewaa okonu kwechia ndu ono, akpukwa igbulọ ono iphu.”

⁶Noo ya; anyi kpua igbulọ ono kpujaha iya ẹbo lē g'o shi hahawaa; kele ndu ono phuberu iphu eje ozi ono.

⁷Teke Sambalatu; mē Tobaya; mē ndu Arabu; mē ndu Amonu; mē ndu Ashidodu nūmaerupho l'aakpukwa-a igbulọ Jierusalemu ono g'aakpu iya; teme l'eka ụzo dū iya bē akpu-chishiwa; ẹhu wata phe eghushi egbu ike. ⁸Ephe nokobe chia idzu g'ephe bya ogu lē Jierusalemu; bya akuru utsu yeru phe. ⁹Tobudu iya bu; anyi bya epfuru nū Chileke anyi; woru ndu nche ye g'ephe cheje mkpukpu ono nche eswe l'enyashi; g'ephe be eme iphe, ephe chiru idzu iya.

¹⁰Ọ bụru teke ono bẹ ndu Jiuda wataru epfu su: “Ike abvụakwa ndu leje ozi obu; teme mkpokpo igbulọ pakwadu-a ẹka; k’ophu bu l’anyi ta amadu g’anyi e-shi kpukwaa igbulọ obu.”

¹¹Ndu ohogu anyi nodu epfukwapho su l’anyi -bya amaru; mbu l’anyi -bya ahuma phe; bẹ ephe nowaa l’echilabo anyi egbushi anyi; k’ophu eje ozi ono e-buhu. ¹²No iya; ndu Jiu, bukube phe nu byapfutawa anyi iphe, rwuru ugbo iri bya akaru anyi l’iphe, bukpoobiya ophu anyi shiru bẹ ndu ohogu anyi ono e-shikwa byapfuta anyi ogu. ¹³Oo ya bu; mu bya eye ndu nche l’azu igbulọ ono; g’ephe cheje nche l’eka igbulọ ono kachaa mkpulali; mbu ẹka a kpu-beru iya ubele. Mu gbaa ndu nche ono l’ipfu l’ipfu; ephe pagbaaru ogu-echi phe; me arwa phe; me apfu phe.

¹⁴Mu bya ahuma g’iphe du; mu gbalihu pfiaru ndu a maru ephe phe; me ndu-ishi; mewaro ndu ozo su phe: “Unu ta atsushi ndu-a ebvu! Unu nyatanu Nnajiuphu ono, bu onye paru ẹka; bya aburu onye du ebvu ono! Unu lwua ogu ehun ndibe unu; me kunwu unu unwoke; me kunwada unu; me kunyomu unu; me kunuphu ibe unu.” ¹⁵Teke ndu ohogu anyi numaru lejo idzu ono, ephe chiru anyi ono bẹ anyi mawaru; mbu le Chileke mebiwaru iya; oo ya bu anyi tuko g’anyi ha laphu azu je akpaha igbulọ ono ozo.

¹⁶E-shi le mboku ono kwaseru bẹ nkeru-ẹbo l’unwoke, ejeru mu ozi bu phe jehaaru ozi ono; nkeru-ẹbo ophuna nodu le nche; paru arwa; me iphe, eegudeje gbobuta onwonye; me apfu; yee uwe-ogu. Ndu-ishi pfuru ndu onu-ulo Jiuda l’ophu l’azu; ¹⁷ephe nodu akpu igbulọ ono. Ndu ophu evu iphe, e gude eje ozi ono gude ẹka lanu eje ozi ono; gude ẹka ophuu paru ngwo. ¹⁸Ndu ophu akpu igbulọ ono l’ehu l’ehu tucharu ogu-echi phe l’upfu akpu iya. Onye egbuje opu pfuru mu laguga. ¹⁹Tobudu iya bu; mu pfiaru ndu a maru ephe phe ono; me ndu-ishi ono; me ndu ozowaro su phe-a: “Ozi-a pakwaru ẹka; teme o ha osa shii; o mee anyi nodu onwanyi uzanya uzanya l’igbulọ-a. ²⁰Iphe, bukpo ẹka unu numaru oda opu ono; unu wuru byapfuta anyi l’eka ono. Chileke anyi a-lwuchiru-a anyi ogu!” ²¹Noo g’anyi shi jee ozi ono; nkeru-ẹbo nodu apajeru arwa e -shi le nchi-abohu jeye l’enyashi teke kpokpode lufutawaru. ²²Iphe ozo, mu pfukwarupho ndu ono teke ono bu: “G’onyenonu yele onye ejeru iya ozi zekwa l’ime Jierusalemu l’enyashi; k’ophu ephe a-buru anyi ndu nche l’enyashi; teke o beru leswe ephe ejee ozi.” ²³G’anyi ha; mbedia; me unwune mu; me ndu-ozu mu; me ndu nche, mu lephe no bẹ ta adudu onye eyefuje iphe, o yeru l’ehu eyefu. Onyenonu apajeru ngwo iya; o beta-kporu o buru mini bẹ onye obu eje ekuta.

Nehemaya eyeru ndu ukpa ẹka

5 ¹A nonyaa; unwoke ndu Jiuda; waa unyomu phe wata echi mkpu iphe, ndu Jiuda ibe phe l’eme phe. ²O nweru ndu ophu epfu su:

“Anyi l'unwegirima anyi unwoke me unwanyi be ha igwerigwe; o o ya bu g'a hanaa anyi g'anyi chota akpuru ereshi ria nodu ndzu.”

³ O dukwarupho ndu ophu epfu su: “Anyi yeru ali anyi l'itumo; yechaa opfu-vayinu anyi; me ulo anyi g'ee-shi g'anyi huma ereshi ria legu, eme nu.”

⁴ O duru ndu ophu suru: “Anyi jiwaru ugwo tua utu ali anyi; me k'opfu-vayinu anyi nu eze. ⁵ A makwaru-a l'anyi le ndu Jiu ibe anyi phe be gbaru ugbugba lanu. O buru g'unwegirima phe du ree bu g'unwegirima nkanyi dukwapho; obenu l'unwegirima anyi unwoke me unwanyi be anyi dobewaru l'onodu ohu. Unwada anyi nwekwaru ndu ophu gbẹ buwaru nu ohu nta; ophu anyi ta amadu g'anyi e-me gbafuta phe; kele ali anyi me opfu-vayinu anyi bukotawa ke ndu ozo.”

⁶ Mu numaeapho mkpu ono, ephe echi ono; yele iphe ono, ephe epfukashi ono; ehū wata mu eghushi egū ike. ⁷ Mu bya arichaa iphe ono l'ime onwomu; mu bobe iya ndu a maru epha phe me ndu-ishi. Mu su phe: “O kwa ndu Jiu ibe unu be unu anataje ugwo ntukwase.” Mu bya ekua ndzuko, ha shii g'a chia idzu g'ee-shi nua phe chiipfu. ⁸ Mu su phe: “Nta-a be anyi kukeberu ehū gbafuta unwune anyi, bu ndu Jiu, e shi ree ndu ohozo. Unubedua bya nta-a bya ereshiahaa unwune unu ono ozo g'anyi zu-phua-ha phe azu.” Mu pfuchaa nno; ephe daa ke nyonyoronyo; ophu ephe ta amadu iphe, ephe e-pfu.

⁹ Mu sukwa phe pho ozo: “Iphe, unu eme ta adukwa ree. ?To gbaduru g'unu tsua Chileke anyi ebvu k'opfu ndu ohozo, bu ndu ohogu anyi ata watadu anyi aja ewenu? ¹⁰ Mbēdua; me unwune mu; me ndu-ozī mu be ejiejekwa ndibe anyi ugwo okpoga me ugwo ereshi. Ole o o g'anata ugwo ntukwase laa! ¹¹ Unu nu-phukota phe ali phe azu ntanu-a; me opfu-vayinu phe; me mgbabu olivu phe; me ulo phe. Unu eworu ntukwase, unu nataru phe l'okpoga; me l'ereshi; me le mee; me le manu nu-phukota phe azu.”

¹² Ephe tuko su: “Anyi a-nu-phukota iphe ono azu. O to dudu iphe, anyi a-suba g'ephe nu anyi ozo. Oo ephe g'i suru g'anyi mee bu g'anyi e-me.”

Mu bya ekua ndu-uke Chileke; woru nte nu ndu a maru epha phe ono; me ndu-ishi g'ephe mee iphe ono, ephe kweru ukwe iya ono. ¹³ Mu bya ajia uwe mu phulaphula su: “G'o bukwaru egube-a be Chileke a-jifu ndu te emeduru iphe, ephe kweru ukwe iya; mbu jifu phe l'ulo phe; me l'iphe, ephe nweru. G'o bukwaru nno bu g'aa-jifu onye ono; gbabe iya eka oto!”

Ndzuko ono l'opfu tuko za mgbede su: Nokwa g'o du. Ephe jaa Chipfu ajaja. Ndu ono mee iphe ono, ephe kweru ukwe iya ono.

Nehemaya ta abudu ehū iya b'o maru nwekiya

¹⁴ E -shi le teke a turu mu eka ge mu buru ochi-oha l'ali Jiuda; mbu l'apha, kwe Atakuzakuzesu apha ukporo jeye l'apha, kwe iya ukporo apha l'apha iri lebo, o wataru aburu eze; l'ime apha iri lebo ono be mbēdua;

mẹ ụnwunna mu ta adụdu onye ọp̄hu rijeru nri, gbaru ọchi-ọha. ¹⁵Obenu lẹ ndu ọchi-ọha ọp̄hu vu mu ụzo bụru ishi bẹ shi bo ndu Jiuda ivu anyị-nyị; shi anakoje p̄hẹ nri mẹ m̄e; bya eyekoberu mkp̄ola-ọchaa, ẹrwa iya d̄u ụkporo shẹkelu labo, ẹp̄he shi at̄uje. Nokwap̄ho ḡe ndu shi ejeru p̄hẹ ozi shi akpa ndu Jiuda ono ẹhu. Ọle mb̄edua gude ats̄u Chileke ebvu ọp̄hu mu te emeduru ẹgube ono. ¹⁶Mu gb̄e yechiaru ẹhu lẹ k'akp̄u igbulo ono; ọp̄hu ọ d̄udu ali, anyi zuru m'ilile. Ndu ozi mu g'ẹp̄he ha dzuk̄otaep̄ho eje ozi ono l'ẹka ono. ¹⁷Ọzo b̄uru lẹ ụkporo ụmadzu ẹsaa l'ụmadzu iri; mb̄u ndu Jiu; m̄e ndu b̄u ndu-ishi b̄e an̄oduje eri nri lẹ teburu mu; yekoberu ndu eshije l'ọhamoha, n̄o-pheru anyi mgburugburu byapfuta anyi. ¹⁸Mb̄oku-mb̄oku b̄e eegbuje oke-eswi lanu; waa at̄uru ishii, ẹhu d̄u ree; m̄e ọku gude shiaru mu nri. Abali iri, nw̄utaru anw̄uta b̄e eevutajeru mu m̄e, d̄u iche iche; vuta iya k'etsutsu. A makwaru-a l'iphemip̄he ono d̄ukota; ọle mu ta as̄ujeduru g'a n̄u mu oke nri, rwuberu ọchi-ọha; noo kele ivu-erwa ndu Jiuda vu b̄e pan̄ukaru ẹka.

¹⁹Jiko Chileke mu; nyatakwa mu ro lẹ k'oma l'iphemip̄he-a, mu meko-taru ndu-a.

Ejo idzu, a chiru Nehemaya

6 ¹Sambalatu; m̄e Tobaya; m̄e Geshemu, b̄u onye Arabu; m̄e ndu ọhogu anyi ọzo bya an̄uma lẹ mu kp̄u-ghewaru igbulo ono; ọp̄hu ọ t̄o d̄udu ẹka ghekwaduru iya ọnu; ọle teke ono b̄e mu teke yeshidu mgbo l'oguzo iya. ²Sambalatu yele Geshemu zia mu ozi s̄u ḡe mu bya ḡe mu l'ep̄he dzuda lẹ mkp̄ukpu lanu, d̄u lẹ baswaa ali, aza Ono. Obenu l'ip̄he, ẹp̄he chiru idzu iya b̄u g'ẹp̄he meka mu ip̄he. ³Mu zia ndu-oz̄i g'ẹp̄he je ezia p̄hẹ s̄u p̄hẹ: “Ozi, mu gude l'ẹka b̄e pakwaru ẹka. Mu ta abyak̄otakwa. ?D̄enu ḡe mu e-shi par̄u ozi ono haa g'ọ rw̄uhu lẹ mu abya unu aza oku?”

⁴Ugbo ẹno b̄e ẹp̄he ziru mu ozi lanu ono; ọ b̄uru ọnu, mu yehawaru b̄e b̄u ọnu, mu yekotaru p̄hẹ.

⁵O be lẹ k'ise iya; Sambalatu zia nwozi iya g'ọ gude ozi lanu ono byapfuta mu. Ọ b̄uru ẹkwo-oz̄i, e gheberu ọnu b̄e ọ gude bya. ⁶L'ime ẹkwo ono b̄e ọ deru s̄u:

“Ip̄he, ngakotaru ọhamoha; t̄eme Geshemu gbakwaap̄ho ama iya b̄u lẹ ḡu lẹ ndu Jiu b̄e agba idzu g'unu kwefu ike; ọ b̄uru iya meru ip̄he unu akp̄ukwa igbulo ono. Ip̄he ọzo, e pfuru ye iya b̄u l'ọo ḡubedua eme g'ị b̄uru eze p̄hẹ. ⁷Ọzo b̄u l'ị gb̄e hotawa ndu mpfuchiru g'ẹp̄he je araa k'opfu ẹhu ngu arara lẹ Jierúsalem̄u s̄u l'ị b̄u eze ndu Jiuda. O doru ngu ẹnya l'opfu ono e-rwu eze lẹ nch̄i. Ọo ya b̄u l'ọ kakwa ree g'ị byakwa g'anyi ch̄i-zia ya ach̄i-z̄i.”

⁸Mu ziphu iya ozi az̄u s̄u iya: “Ip̄he ono, iipfu ono ta ad̄ukwa ọp̄hu meru ememe ilile; ọ kwa l'obu ngu b̄e ị ritaru iya pfua.”

⁹Iphe ono bu iphe, ephe eme g'anyi tsuhu ebvu; kele ephe riru l'anyi aparu ozi ono haa; anyi te ejefuedu iya l'ishi. Ole mu rworu Chileke su iya: "Jiko menaa g'eka shihu mu ike."

¹⁰O be teke mu jeru l'ulo Shemaya nwa Delaya, mbu nwanwa Mehetabelu, bu onye ta lufujedu alufu l'ibe iya; o su ge mu l'ia dzuda l'ulo Chileke; l'ime ime eze-ulo ono; g'anyi gu-chishia mgbo, du l'eze-ulo ono agu-chishi; lo nweru ndu l'a-bya mu egbugbu; l'oo lenyashi be ephe a-bya mu egbugbu obu.

¹¹Ole iphe, mu pfuru bu: "Bu onye du ge mbedua be a-gbalaaha agbala? Mbu bu onye du ge mbedua be a-gbaru lashia l'eze-ulo Chileke ge mu dzota ndzu mu? Mu te jedu."

¹²O buru teke ono be o byaru edoo mu enya lo to budu Chileke be ziru iya nu; l'oo Tobaya ye Sambalatu pfuru iya ugwo g'o pfua iphe, a-tsuru mu nu. ¹³Ephe pfuru iya ugwo g'o yee mu ebvu; k'ophu mu e-me iphe, o suru ge mu mee; shi nno mee iphe-aji; g'ephe e-nweru iphe, ephe a-gbabe okpa gube mu ejo epha; mee mu iphe-iphere.

¹⁴Gube Chileke mu; ta azohakwa iphe, Tobaya ye Sambalatu meru mu. Nokwapho gi ti zohakwapho nwanyi mpfuchiru ono, bu Nowadaya; me ndu mpfuchiru ozo, shi eme g'ephe yee mu ebvu.

Aakpu-ghe igbulo ono

¹⁵Noo ya; iphe, a kpuru igbulo ono bu ukporo abali labo l'abali iri lebo. Mboku, a kpu-gheru iya bu l'ukporo abali l'abali ise lonwa Elulu.

¹⁶Ndu ohogu anyi l'ophu; me iphe, bu ndu ohozo, bupheru anyi mgburugburu numae ya pho; ephe pehu onwophe lenya; noo kele o byaru edoo phe enya l'ozu ono be bu Chileke anyi yeru anyi aka; anyi jefu iya l'ishi.

¹⁷Le teke ono be ndu a maru epha phe l'ali Jiuda nuru Tobaya ekwo-ozu, du igwerigwe. Ekwo-ozu ophu shi Tobaya leka nodu anodujkwapho abyaru phe. ¹⁸Noo kele ndu du igwerigwe l'ali Jiuda be riru nte turu ike yeru iya; kele o bu ogo Shekanaya nwa Ara; teme nwa iya nwoke, bu Jiehohananu lukwaapho nwada Meshulamu nwa Berekaya. ¹⁹Teme ephe nodu anodujkwapho epfushiru mu iphe, du ree, Tobaya lemegbabe. Iphe, mu pfuru; ephe aturuta iya je edooru iya. Tobaya nodu edetajeru mu ekwo ge ya gude yee mu ebvu.

7 ¹A kpu-ghechaa igbulo ono; mu bya eyeshikota iya mgbo. A bya ahoo ndu nche onu-oguzo; me ndu ebvu; me ndu Livayi. ²Ndu mu meru ishi ndu Jierusalemu bu nwune mu Hanani; ye Hananaya, bu onye-ishi ulo-mgbobuta. Noo kele Hananaya bu onye e gude ire iya aka; teme o ka atsuh Chileke ebvu eme l'igwerigwe ndu ozo. ³Iphe, mu pfuru phe bu: "G'a ta aguhajekwa onu-abata Jierusalemu ghebe onu lebe abu lenyanwu gbakotaru. O -buru le ndu nche nokwadu le nche; g'a gu-chishije mgbo iya agu-chishi swobechaa ya mgborigwe. Unu shi le ndu bu le

Jierúsalemu hōta ndu nche; g'ēphe cheje nche l'ēka dū k'eche nche; ndu ophuu anōdu l'iphu ọlo phē eche.”

Ndu shi l'ēka a kpūru phē lē ndzū lwa

(Ezu 2:1-70)

⁴Jierúsalemu bụ eze mkpūkpu, ha shii bya aha kẹ phorokotokongu; ophu ndu nọ iya nụ abadụ nwishi; tẹme ophu ọ dudu ọlo, a kpūwaru iya. ⁵Tọbudu iya bụ; Chileke mu yee mu iya l'obu gẹ mu kukọo ndu ono, a maru ẹpha phē ono; mę ndu-ishi; męwaro ndu ọzo g'e deshia ẹpha phē l'eri phē l'eri phē. Mu bya ahuma ẹkwo, e deshiru ẹpha ndu vu ọzo, shi l'ēka a kpūru phē lē ndzū lwa; mbụ ẹkwo, e deshiru phē l'eri phē l'eri phē. Iphe, mu humaru, e deru l'ẹkwo ono bụ:

⁶Waa ndu Ízurelu ono, shi l'alí Bábilonu lwa; mbụ ndu ono, a kpūjeru lē ndzū laa alí ọzo, bụ iya bụ ndu Nebukadineza, bụ eze ndu Bábilonu kpūkojeru laa Bábilonu ono. Ẹphe lwaru Jierúsalemu; mę Jiuda; onyeno-nu lashichaa mkpūkpu ẹka o shi. ⁷Ndu ẹphe tso lwa bẹ bụ Zerúbabelu; mę Jieshuwa; mę Nehemaya; mę Azaríya; mę Ramaya; mę Nahamani; mę Mōdekayi; mę Bilishanu; mę Misuperetu; mę Biguvayi; mę Nahumu; mę Bana.

Waa gẹ ndu Ízurelu ono ha
bụ ọwana:

- ⁸Oshilọkpa Paroshi bẹ dū
unu ise l'ụkporo ẹsato
l'umadzu iri l'ẹbo.
- ⁹Oshilọkpa Shefataya dū
ụkporo iri l'ẹsato l'umadzu
iri l'ẹbo.
- ¹⁰Oshilọkpa Ara dū unu
nemadzu l'ụkporo iri l'ẹbo
l'umadzu iri l'ẹbo.
- ¹¹Oshilọkpa Pahatu-Mówabu,
bụ iya bụ ndu shi l'eri
Jieshuwa yele Jiowabu bẹ dū
unu ẹsaa l'iri l'ẹsato.
- ¹²Oshilọkpa Elamu dū unu ẹto
l'ụkporo labọ l'umadzu iri
l'ẹno.
- ¹³Oshilọkpa Zatu dū unu labọ
l'ụkporo labọ l'umadzu ise.
- ¹⁴Oshilọkpa Zakayi dū unu
nemadzu l'ụkporo iri l'ẹsato.
- ¹⁵Oshilọkpa Binuyi dū unu

- l'umadzu ukporo iri l'ebo
l'umadzu esato.
- 16 Oshilokpa Bebayi du unu
l'umadzu ukporo iri le
nanu l'umadzu esato.
- 17 Oshilokpa Azugadu du unu
ise l'ukporo iri l'ishii
l'umadzu labo.
- 18 Oshilokpa Adonikamu du
unu l'ukporo iri l'eto
l'umadzu esaa.
- 19 Oshilokpa Biguvayi du
unu ise l'ukporo eto
l'umadzu esaa.
- 20 Oshilokpa Adinu du unu
ukporo iri l'ebo l'umadzu
iri l'ise.
- 21 Oshilokpa Ateya, bu iya bu
ndu shi l'eri Hezekaya be du
ukporo eno l'umadzu iri
l'esato.
- 22 Oshilokpa Hashumu du
ukporo iri l'ishii l'umadzu
esato.
- 23 Oshilokpa Bezayi du ukporo
iri l'ishii l'umadzu eno.
- 24 Oshilokpa Harifu du ukporo
ise l'umadzu iri l'ebo.
- 25 Oshilokpa Gibiyonu du
ukporo eno l'umadzu iri
l'ise.
- 26 Unwoke, shi le Betulehemu
me Netofa be du ukporo tete
l'umadzu esato.
- 27 Ndu ke Anatotu du ukporo
ishii l'umadzu esato.
- 28 Ndu ke Betu-Azumavetu
be du ukporo labo
l'umadzu labo.
- 29 Ndu ke Kiriya-tu-Jarimu;
me Kefira; me Berotu du
unu l'ukporo iri l'esaa

- l'umadzu ẹto.
- 30 Ndu ẹ Rama; me Geba du
unu l'ukporo iri le nanu
l'onye lanu.
- 31 Ndu ẹ Mikumashi du ukporo
ishii l'umadzu labo
- 32 Ndu ẹ Betelu; me Eyayi du
ukporo iri le nanu l'umadzu
ẹto.
- 33 Ndu ẹ Nebo ophunapho
be du ukporo labo l'umadzu
iri lebo.
- 34 Ndu ẹ Elamu ophunapho be
du unu ẹto l'ukporo labo
l'umadzu iri leno.
- 35 Ndu ẹ Harimu du ukporo iri
l'ishii.
- 36 Ndu ẹ Jieriko du ukporo iri
lesaa l'umadzu ise.
- 37 Ndu ẹ Lodu; me Hadidi;
me Ono be du unu l'ukporo
iri l'ishii l'onye lanu.
- 38 Ndu ẹ Senaa du unu tete
l'ukporo iri l'ishii l'umadzu
iri.
- 39 A bya le ndu-uke Chileke:
Oshilokpa Jiedaya, bu iya bu
ndu shi l'onu-ulo Jieshuwa
be du unu labo l'ukporo
esato l'umadzu iri leto.
- 40 Oshilokpa Ima du unu labo
l'ukporo iri lebo l'umadzu
iri lebo.
- 41 Oshilokpa Pasho du unu ẹto
l'ukporo labo l'umadzu esaa.
- 42 Oshilokpa Harimu du unu
labo l'ukporo iri l'umadzu
iri lesaa.
- 43 A bya le ndu Lívayi:
Oshilokpa Jieshuwa; me
Kadumelu, bu iya bu
ndu shi l'eri Hodavaya be

- dù ụkporo ẹto l'ụmadzu iri
l'ẹno.
- 44 A bya ẹ ndu aguje ebvu:
Oshilọkpa Asafu bẹ dù
ụkporo ẹsaa l'ụmadzu ẹsato.
- 45 A bya ẹ ndu nche ọnu-abata:
Oshilọkpa Shalumu; mẹ
oshilọkpa Ateya; mẹ oshilọkpa
Talụmonu; mẹ oshilọkpa
Akubu; mẹ oshilọkpa Hatita;
mẹ oshilọkpa Shobayi bẹ
tụkoru dù ụkporo ishii
l'ụmadzu iri ẹsato.
- 46 Ndu anọduje eje ozi l'eze-ulo
Chileke bụ:
Oshilọkpa Ziha; mẹ
oshilọkpa Hasufa;
mẹ oshilọkpa Tabayotu;
- 47 mẹ oshilọkpa Kerosu;
mẹ oshilọkpa Siya; mẹ
oshilọkpa Padonu;
- 48 mẹ oshilọkpa Lebana;
mẹ oshilọkpa Hagaba; mẹ
oshilọkpa Shamulayi;
- 49 mẹ oshilọkpa Hananu;
mẹ oshilọkpa Gidelu;
mẹ oshilọkpa Gaharu;
- 50 mẹ oshilọkpa Reyaya;
mẹ oshilọkpa Rezinu; mẹ
oshilọkpa Nekoda;
- 51 mẹ oshilọkpa Gazamu;
mẹ oshilọkpa Uza; mẹ
oshilọkpa Paseya;
- 52 mẹ oshilọkpa Besayi;
mẹ oshilọkpa Meyuni;
mẹ oshilọkpa Nefisimu;
- 53 mẹ oshilọkpa Bakubuku;
mẹ oshilọkpa Hakufa;
mẹ oshilọkpa Hahuru;
- 54 mẹ oshilọkpa Bazulutu;
mẹ oshilọkpa Mehida;
mẹ oshilọkpa Hasha;

- 55 me oshilokpa Bakosu;
me oshilokpa Sizera;
me oshilokpa Tema;
- 56 me oshilokpa Nezaya;
me oshilokpa Hatifa.
- 57 A bya le ndu bu oshilokpa
ndu-ozì Sólomónu bu:
Oshilokpa Sotayi;
me oshilokpa Soferetu;
me oshilokpa Perida;
- 58 me oshilokpa Jiala; me
oshilokpa Dakonu; me
oshilokpa Gidelu;
- 59 me oshilokpa Shefataya;
me oshilokpa Hatilu; me
oshilokpa POKeretu-Hazebayimu;
me oshilokpa Amonu.
- 60 Ndu eje ozi l'eze-ulo
Chileke g'ephe ha; me oshilokpa
ndu-ozì Sólomónu be du
ukporo iri le tete l'umadzu iri
lebo.

61 Ndu owana bu ndu ophu shi le mkpukpu Telu-Mela; me le mkpukpu Telu-Hasha; me le mkpukpu Kerubu; me le mkpukpu Adonu; me le mkpukpu Ima Iwa. Ole ndu ono ta adudu ike goshi onu-ulo, ephe shi futu; me oshilokpa onye ephe bu; k'ophu ee-shi nno maru ?ephe bua ndu Izurelu?

62 Oshilokpa Delaya; me oshilokpa Tobaya; me oshilokpa Nekoda be du unu l'ukporo iri lebo l'umadzu labo.

63 A bya l'oshilokpa ndu-uke Chileke: oshilokpa Hobaya; me oshilokpa Hakozu; me oshilokpa Bazilayi; nwoke ono, luru nwada Bazilayi k'alì Giladu; a nodu ekuwa iya ro epha ala l'epha iya. 64 Ndu ono be a choru epha phe lekwo, e deru g'e gude nwushia phe; ole a ta ahumaduru epha phe lekwo ono. Oo ya bu; e wofu phe g'ephe ta abuseru ndu-uke Chileke; do-be phe ge ndu aaso nso. 65 Ochi-oha bya asu g'ephe ta ayijeshiru ria nri, kakota adu nso jasu teke ee-nweru onye uke Chileke, e-gude ido Urimu; waa Tumimu kpata Chipfu ishi.

66 A -kpakota igwe-oha ono be ephe du ukporo unu ise l'unu ise l'ukporo iri lesato;^a 67a -gufukwa ndu-ozì phe unwoke; me unwanyi, ndu du unu iri lesato l'ukporo ishii l'umadzu iri lesaa. Ephe nwekwarupho ukporo umadzu iri lebo l'umadzu ise, bu unwoke yele unwanyi, anoduje agu

^a 7:66 Bu iya bu 42,360 le mbekee.

ebvu; ⁶⁸bya enweru ìnya, dù ọ̀nu l'ùkporo iri l'ishii l'ìnya iri l'ishii. Èphe nweru ìnya-mulu, dù ọ̀kporo iri l'èbo l'ìnya-mulu ise. ⁶⁹Ìnya-kamèlu p̄hè dù ọ̀nu l'ùkporo l'iri l'ise; bya enweru nkapfù-ìgara, dù ọ̀nu iri l'ishii l'ùkporo iri l'ishii.

⁷⁰O nweru ndu-ishi l'ènya-unuphu ibe nna p̄hè, n̄uru iphe g'e gude ye-ta èka jee ozi ono. Ochi-òha b̄e yeru èkpa mkpòla-ododo iri l'ùlo-èku; m̄e gbamùgbamu, dù ọ̀kporo labò l'iri; m̄e uwe ndu-uke Chileke, dù ọ̀nu uwe l'ùkporo ishii l'iri. ⁷¹Ndu b̄ugbaa ishi l'ènya-unuphu ibe nna p̄hè haru woru mkpòla-ododo, dù ọ̀kporo ọ̀nu ugbo labò l'ọ̀nu iri; n̄u g'e dobe l'ùlo èku, ee-gudeje jee ozi ono; bya an̄u mkpòla-òchaa, dù ọ̀kporo ọ̀nu ugbo iri l'èto l'ọ̀nu iri l'ise. ⁷²Mkpakò iphe, ndu ọ̀zo n̄uru b̄u mkpòla-ododo, dù ọ̀kporo ọ̀nu ugbo labò l'ọ̀nu iri; m̄e mkpòla-òchaa, dù ọ̀kporo ọ̀nu ugbo iri l'èbo l'ọ̀nu iri; m̄e uwe ndu-uke Chileke, dù ọ̀kporo èto l'èšaa.

⁷³Tòbudu iya b̄u; ndu-uke Chileke; m̄e ndu Lívayi; m̄e ndu nche ọ̀nu-oguzo; m̄e ndu agùje ebvu; m̄e ndu eje ozi l'èze-ùlo Chileke; m̄ewaro ndu ọ̀zo; m̄e ndu Ízurèlu g'èphe ha t̄uko buchaaru l̄e mkp̄ukpu l̄e mkp̄ukpu p̄hè.

Èzura agù èkwo ekemu Chileke

8 ¹O rwua l'ònwà k'èšaa teke ndu Ízurèlu bukòtawà l̄e mkp̄ukpu l̄e mkp̄ukpu p̄hè; ndu Ízurèlu g'èphe ha dzukòta l'edupfu, n̄o l'iphu mkpòchi-oguzo, Ọ̀nu-Abata-Mini. Èphe s̄u Èzura, b̄u onye edeje èkwo g'ò wofuta èkwo ekemu Mòsisu, b̄u iya b̄u ekemu, Chipfu t̄uru n̄u ndu Ízurèlu. ²O be l'abalì mb̄u l'ònwà èšaa; Èzura, b̄u onye uke Chileke wofuta èkwo ekemu ono l'iphu edzudu-òha l'èka unwoke m̄e ọ̀nwanyi; m̄e ndu iphe edoje ènya d̄oru. ³O n̄odu l'edupfu ono, dù l'iphu Ọ̀nu-Abata-Mini ono ḡua èkwo ekemu ono l'èka unwoke m̄e ọ̀nwanyi; m̄e ndu ono, iphe edoje ènya d̄oru ono. O shi l'ònmewa ọ̀tsu ḡua ya jas̄u l'echilabò eswe. Edzudzu-òha ono ngabè nchì ree l'iphe, èkwo ekemu ono epfu.

⁴Èzura, b̄u onye edeje èkwo b̄e p̄furu l'eli èka a gbaru oshi agbagba, b̄u èka e meru medoru k'iphe, èphe eme ono. Ndu p̄furu iya l'èkutara b̄u Matitaya; m̄e Shema; m̄e Anaya; m̄e Uráya; m̄e Hilikaya; m̄e Maseya. Ndu p̄furu iya l'èkicha b̄uru Pedaya; m̄e Mishèlu; m̄e Malukayijia; m̄e Hashumu; m̄e Hashubadana; m̄e Zekaraya; m̄e Meshulamu. ⁵Èzura bya ekpuhaa èkwo ono; èphe h̄umakota; noo k̄ele èka o p̄furu b̄e o kakòta ndu ono l'eli. Teke o kpuharu iya b̄e èphe t̄ukoru wulihu p̄furu ap̄furu. ⁶Èzura jaa Chipfu ajaja; mb̄u Chileke ono, parù èka ono.

Ndu ono chilikòta èka p̄hè imeli z̄ua s̄u: “Nokwa g'ò dù! Nokwa g'ò dù-o!” Èphe phozeta kpube iphu l'alì baaru Chipfu eja. ⁷Ndu Lívayi, b̄u Jieshuwa; m̄e Bani; m̄e Sherebaya; m̄e Jiaminu; m̄e Akubu; m̄e Shabetayi; m̄e Hodaya; m̄e Maseya; m̄e Kelita; m̄e Azaríya; m̄e Jiozabadu; m̄e Hana-nu; m̄e Pelaya b̄e yetaru èka mee g'ekemu ono doo ndu ono ènya g'èphe

pfukwaduru l'eka ono. ⁸Ɛphe gwa iphe, du l'ekwo ekemu Chileke ono rīṣaa; bya akoo iphe o bu; mee iphe ono, a guru ono dokota enya.

⁹Ochi-oha, bu Nehemaya; me Ezura, bu onye uke Chileke; buru onye edeje ekwo; me ndu Līvayi, bu ndu ezi ndu ono ekemu ono bya epfukota opfu nu ndu ono su phe: “Ntanu bukwa mboku, duru Chipfu, bu Chileke unu nsọ. Unu ta agukwa aphu; ophu unu arakwa ekwa.” Iphe, kpataru ephe pfua nno bu le ndu ono g'ephe ha wataru ara ekwa g'ephe numaru iphe, ekemu ono pfuru. ¹⁰Nehemaya su phe: “Unu lashiwaro je eria okpobe nri; unu angwa mee, l'atso rengurengu; unu ewota je anu ndu ophu te enwedu ophu ephe shiru g'ephe ria. Ntanu-a dukwaru Nnajiuphu nsọ. Unu ta arashi ekwa; noo kele ehutu ophu shi l'eka Chipfu be bu ike, du unu.”

¹¹Ndu Līvayi gboo ndu ono g'ephe ha ekwa; asuje phe: “Unu nodu doo; kele ntanu-a bukwa mboku, du nsọ. Unu ta arashi ekwa.” ¹²Ndu Izurelu g'ephe ha wukashihu lashi je eria ngwa; wojechaaru ndu ozo nri; mbu gude ehutu boro obo-iphe ono; noo kele opfu ono, a guru phe ono be doru phe enya.

Obo-Mkpù

¹³O be le mboku k'ebo iya; ndu-ishi, shi l'enya-unuphu l'enya-unuphu ndu Izurelu; me ndu-uke Chileke; me ndu Līvayi wuru bya ado-pee Ezura, bu onye edeje ekwo g'ephe nwua iphe, ekemu ono pfuru. ¹⁴Ɛphe huma le deru l'ime ekwo ekemu ono le Chipfu shi l'eka Mosisu tua ekemu su; le ndu Izurelu be e-bujeru l'ime mkpu le teke aabo obo-iphe lonwa esaa. ¹⁵Wakwapho l'oo g'ephe raa ya arara; mee g'a numa-dzuru iya le mkpukpu phe l'ophu; yele Jierusalemu su: “Unu tugbua je l'ubvu je egbukoo ekali-oshi olivu; me ekali-oshi payinu; me ke mituru; me igu; me ekali-oshi ozo, nwe-ru ekwo; ge gude tushia mkpu egube ono, e deru iya l'ekwo ekemu ono.”

¹⁶Oo ya bu; ephe tugbua je egbukoo ekali-oshi ono bya atushiaru onwophe mkpu; onyenonu tua nkiya l'eli ulo iya; me l'oma-unuphu phe; me l'oma-unuphu eze-ulo Chileke; me l'edupfu ono, no-kube Onu-Abata-Mini; me ophu no-kube Oguzo Ifuremu. ¹⁷Igwe-oha ono, bu ndu shi l'eka a kpuru phe le ndzu lwa ono; tushikota mkpu ono buru. Mbu le ndu Izurelu ta atujeduru egube Mkpù ono; e -shi teke Jioshuwa nwa Nunu no jeye mboku ono. Ehu tsoo phe utso shii.

¹⁸Ezura shiepho e -shi ke mboku mbu, a wataru abo obo-iphe ono aguepho iphe, e deru l'ekwo ekemu Chileke ono; ague ya pho mboku-mboku; jeye le mboku ikpazu iya. Ephe boro obo-iphe ono abali esaa; o be le mboku k'esato; ephe nweru ndzuko, du iche egube ekemu pfuru iya.

Ndu Izurelu akoshi iphe-eji, ephe meshiru

9 ¹Onwa ono duepho l'abali ukporo l'eno; ndu Izurelu dzukota swiahaa egu. Ephe yee uwe-aphu; kporu eja kpua onwophe l'ishi. ²Ndu

ophu bu oshilokpa ndu Ízurelu bufu onwophe l'ehu ndu ohozo. Ephe pfuru koshia iphe-eji, ephe meshigbaberu; me ejo-ememe, nna phe me-gbaberu. ³Ephe pfuru l'eka ephe pfuru gua iphe, e deru l'ekwo ekemu Chipfu, bu Chileke phe ono awa eto; ephe gude awa eto ozo koshia iphe-eji, ephe meshiru; bya abaarü Chipfu, bu Chileke phe eja. ⁴Ndu pfuru l'eli mkpogobe aka ono e metaru ndu Lívayi ono bu: Jieshuwa; me Bani; me Kadumelu; me Shebanaya; me Buni; me Sherebaya; me Bani; me Kenani. Ephe chiru mkpu ekwa chiku Chipfu, bu Chileke phe.

⁵Ndu Lívayi, bu Jieshuwa; me Kadumelu; me Bani; me Hashabuneya; me Sherebaya; me Hodaya; me Shebanaya; me Petahaya bya asu:

“Unu gbalihu jaa Chipfu, bu
Chileke unu ajaja; mbu
onye ono, shi l'ojejeje
nodu ndzu; teme o je
a-no jasü l'ojejeje ono.”

G'a jakwaa epha ngu ono,
du akpabiri ono ajaja;
mbu epha ngu ono,
daghataru ajaja, aaja iya;
bya adaghata ekele,
eekeleje iya ono.

⁶Oo ngu kpoloko kpekpu
bu Chipfu.

Oo ngu meru igwe; mee igwe
ophu kakota igwe l'eli;
me iphemiphe, dukota
iya nu.

O buru ngu meru ali;
me iphemiphe, dukota iya nu.

O buru ngu meru eze-enyimu;
me iphemiphe, nokota iya nu.

O buru ngu meru;
ephe nodukota ndzu.

Iphe, dugbaa l'imigwe anoduje
abakotaru ngu eja.

⁷Oo gubedua bu Chipfu,
bu Chileke ono,
bu onye hotaru Ebiramu;
dufuta iya le mkpukpu
Uru l'ali Babilonu bya
agbanwee epha iya;
o buru Ebirhamu.

- 8 I hūmaru l'ọ bụ onye e gude
ire iya ẹka; gū l'iya woru
ndzū gbaa.
- I kwee ya ukwe l'ii-nūkota
yẹle awa iya alì ndu Kénanu;
mẹ alì ndu Hetu; mẹ alì ndu
Amọru mẹ kẹ ndu Pẹrezu;
mẹ kẹ ndu Jiebusu;
mẹ kẹ ndu Gigashi.
- Ukwe-iphe ono, i kweru ono
bẹ i mekọtaru kele i bụ onye
pfiuberu-ẹka-oto.
- 9 I hūmaru iphe-ẹhuka, nna anyi
phẹ jeru l'alì Ijiputu.
Tẹme i nūmakwapho ẹkwa,
ẹphe rarū l'agūga Eze-ẹnyimu
Uswe-uswe.
- 10 I meshiru iphe-ọhumalenya
mẹ iphe, dū biribiri kpua
Fero mẹ ndu-ozì iya l'ophu;
mẹkpoo ndu alì iya l'ophu;
kele i maru gẹ ndu Ijiputu
gude eku-onwonye gwaa
ndibe ngu maa.
- I meru a maru ẹpha ngu;
ọ dū ẹgube ono byasū ntanū.
- 11 I meru eze-ẹnyimu; o kekaha
ẹbo l'iphu phẹ; k'ophu bụ
l'ẹphe jeru ije l'alì ọkponku
ghaa eze-ẹnyimu ono.
- Obenu lẹ ndu achi phẹ ọso bẹ
i tūbaru l'ọhu mini ono;
gẹ mkpuma, a tūbaru l'ime
mini, abya gbukugbuku.
- 12 Eswe bẹ i gude urwukpu,
kpuru oronmono dua
ndibe ngu.
- L'enyashi bẹ i gude ọku,
kpuru oronmono dua phẹ;
g'ọ buru iphóró, a-nọdu
egoshi phẹ uzo, ẹphe e-shi.
- 13 I nyizetaru l'eli úbvú

- Sayinayi; i nɔdu l'imigwe
pfuru opfu nɔ phe.
I nuru phe omelali, pfuru
nhamunha;
me ekemu, bu okpobe iya;
me iphe, i toru okpa iya,
bu iphe, du ree.
- 14 I meru; ephe maru mboku,
i doberu g'o buru
eswe-atuta-unme ngu, du nsɔ.
I shi l'eka nwozi ngu,
bu Mosisu karu phe ekemu,
ephe a-nɔdu etso.
- 15 Teke egu guru phe be i nuru
phe nri, shi l'imigwe.
I kee phe mini, shi leze mkpuma
g'ephe ngua; teke mini
guru phe.
I suru phe g'ephe tugbua je
anata ali ono, i riburu nte
l'i-nu phe ono.
- 16 Oe ephebe nna anyi phe ono
be kuaharu onwophe ekuku;
kwefu ike jika eme iphe,
i suru g'e meje.
- 17 Ephe jikaru eme iphe, i suru
g'ephe mee;
zohashicha iphe, du biribiri,
i meshiru l'echilabo phe.
Ephe kwefuru ike gude ekwefu
ike hota onye-ishi, e-duphu
phe azu le Ijiputu,
bu eka ono, ephe shi buru
ohu ono.
- Obenu l'i bu Chileke, l'aguje
nvu;
i buru onye emeje eze-iphe-oma;
me onye obu-imemini;
teme i buru onye ehu te
eghujedu egu egwegwa;
mbu onye n-yemobu
iya nyiberu anyibe;

- ọ bụru iya meru g'o gude
 ọphu ị paduru phẹ haa.
 18 Je akpaa ị teke ẹphe kpuru
 onwophe nweswi sụ:
 Ọwaa bụ Chileke unu,
 bụ onye dufutaru unu
 l'ali Ijiputu!
 Mẹ teke ẹphe pfubyishiru
 ẹpha ngu njo epfubyishi
 ono.
- 19 Obenu l'i gude eze
 obu-imemini ngu ono
 ọphu ị ti paduru phẹ haa
 l'echiegu.
 Urwukpu ono, kpuru
 oronmono ono ta
 ahajeduru phẹ l'eswe.
 O due phẹ pho shikota l'uzo,
 ẹphe shiru.
 Ọphu oku ono, kpuru
 oronmono ono
 ahajeduru phẹ l'enyashi.
 O nodu abujeru iphoro,
 egoshi phẹ uzo, ẹphe eshi.
- 20 Ị nuru phẹ Unme ngu ono,
 du ree ono go kpo-zijeru
 phẹ uzo.
 Ọphu i ti kwedu g'ẹphe ribuhu
 Mana, shi ngu l'eka.
 Teme ị nukwa phẹ pho mini
 g'ẹphe ngua ị k'egu mini,
 agu phẹ nu.
- 21 Apha ukporo labo be i heru
 phẹ l'echiegu.
 Ọphu o to dudu iphe,
 uko iya dujeru phẹ.
 Uwe phẹ ta akahujeduru
 akahu.
 Ọphu okpa ta abyajeduru
 phẹ erwa.
- 22 "I meru; ẹphe lwuata ali-eze;
 me oha, du iche iche;

- bya eworu alì ndu ono keshiaru
 phẹ g'ọ buru oke alì phẹ.
 Ẹphe nataru alì Heshibonu,
 bu alì-eze Sihonu;
 mẹ alì Beshanu, bu alì-eze
 Ogu.
- 23 I meru g'oshilokpa phẹ
 ha igwerigwe gẹ kpokpode,
 nọ l'igwe.
 I dua phẹ dubata l'alì ono,
 ị sùru nna phẹ g'ẹphe bahu
 je anata ono.
- 24 O buru unwu phẹ bahuru
 je anata alì ono.
 Ị lwu-kpeeru phẹ ndu bu l'alì
 ono, bu iya bu ndu
 Kėnanu.
 I meru gẹ ndu Kėnanu;
 mẹ ndu eze phẹ; mẹ ndu alì
 ono l'ophu lakota phẹ l'eka;
 k'ophu ẹphe e-me phẹ
 g'ọ du phẹ.
- 25 Ẹphe lwutakota mkpukpu
 lẹ mkpukpu, a kpushigbaaru
 ike; mẹ alì, emehuje iphe;
 natakota ọlo, ivu, dugbaa ree,
 du iche iche jiru ejiji.
 Ẹphe natakwapọ wẹlu,
 a tuwaru atutu; mẹ
 opfu-vayinu; mẹ k'olivu;
 mẹ oshi-omi, du iche iche.
 Ẹphe ria ẹpho ji phẹ; dachaa
 okporokpo.
 Ẹguru iphe ono, ị nukotaru
 phẹ ono; bẹ ẹphe riru ọ tsọ
 phẹ ọtso.
- 26 Obenu l'ẹphe te ekwedu mee
 iphe, ị sùru g'ẹphe mee;
 tẹme ẹphe kwefuru ngu ike;
 woru ekemu ngu nwucha
 l'azu.
 Ẹphe gbushiru ndu mpfuchiru

- ngu, bu ndu loru phe eka
 le nchi g'ee-shi g'ephe gha
 iphu l'eka i no.
 Ephe pfubyishia epha ngu
 njo epfubyishi.
- 27 O buru iya meru g'o gude
 i woru phe ye l'eka ndu
 ohogu phe, bu ndu
 mekpaaharu phe ehu.
 Teke ephe no l'iphe-ehuka
 ono be ephe rakuru ngu.
 I gbẹ l'imigwe ngaberu phe
 nchi; bya egude
 obu-imemini ngu, paru eka
 nu phe ndu nafutaru phe l'eka
 ndu ohogu phe.
- 28 Nchi bya adule phe pho doo;
 ephe mee ejo-iphe l'iphu ngu
 ozo.
 I wokwaru phe ye l'eka ndu
 ohogu phe ozo; ephe buru
 ishi phe.
 Ephe byakwa araku ngu ozo;
 i gbẹ l'imigwe ngaberu phe
 nchi.
 I phuhahaaru phe obu-imemini;
 nafuta phe ugbo olemole.
- 29 I loru phe eka le nchi
 g'ee-shi g'ephe laphu
 azu meahaa ekemu ngu.
 O le ephe wataleru-a eku
 onwophe jika eme iphe,
 i suru g'e meje.
 Ephe mee iphe-eji gude mebyia
 omelali ngu;
 mbu omelali ngu ono,
 bu nemadzụ -dobe iya;
 l'o nodu ndzu ono.
 Ephe gude l'ephe bu
 ekwegekwe gbakutaru
 ngu azu;
 teme ephe kwefu ike jika

- angaberu ngu nchi.
 30 Apha, du igwerigwe be i
 takotaru phe nshi.
 Teme i gude Unme ngu lo
 phe eka le nchi shita l'onu
 ndu mpfuchiru ngu.
 O le ephe ta angaduru iya
 nchi.
 O buru iya meru g'o gude i
 woru phe ye l'eka ndu ali ozo,
 bukube phe nu.
- 31 Obenu l'i gude k'obu-imemini
 ngu ono, paru eka;
 ophu i ti kwedu g'ephe chihu;
 ophu i kwedu haa phe;
 kele i bu Chileke ophu emeje
 eze-iphe-oma; bya aburu onye
 aphuje obu-imemini.
- 32 Oo ya bu; gube Chileke anyi;
 mbu gube Chileke, paru eka;
 buru Okalibe;
 bya aburu onye du ebvu;
 mbu gube onye ono,
 edobeje ogbandzu ngu;
 ophu n-yemobu ngu abvudu
 abvubvu;
 jiko g'iphe-ehuka-a,
 anyi ejegbabe-a ta adukwa
 ngu mkpee mkpee l'enya;
 bu iya bu iphe-ehuka, dapfutaru
 anyi le ndu eze anyi-a;
 me ndu-ishi anyi;
 me ndu-uke Chileke anyi;
 me ndu mpfuchiru Chileke anyi;
 mbu iphe-ehuka ono,
 dapfutaru nna anyi phe;
 me ndibe ngu l'ophu;
 e -shi le teke ndu eze ndu
 Asiriya bu ishi byasu
 ntanu-a.
- 33 Iphemiphe ono,
 dapfutakotaru anyi ono be

- iswi dukotakwa ngu mma.
 I meru iphe, pfuru nhamunha;
 obenu l'anyibedua meru
 ejo-iphe.
- 34 Noo kele ndu eze anyi phe;
 me ndu-ishi anyi;
 me ndu-uke Chileke anyi;
 me nna anyi phe te
 emeduru ekemu ngu.
- Ophu ephe ta ngaduru nchi
 l'iphe, i suru g'e mee;
 me l'eka i loru phe le nchi;
- 35 je akpaa le teke ephe no
 l'alì-eze phe l'eka ephe eri
 eguru iphe, paru eka i
 nukotaru phe; bya anodu
 l'alì ono, ha osa ono; mbu ali,
 emehuje iphe,
 bu eka i nuru phe ono;
 be ephe te ejeduru ngu ozi;
 ophu ephe adakobeduru haa
 ejo-ememe, ephe eme.
- 36 Lewaro g'anyi bu ohu nta-a
 l'alì ono, i nuru nna anyi oche
 phe ono; mbu g'ephe ria iphe,
 shi iya futa; me iphe-oma,
 du iya nu ono.
- Lewaro g'anyi bu ohu.
- 37 O buru ndu eze ono, i doberu
 g'ephe buru ndu-ishi anyi-a be
 iphe, shi l'alì ono a-alakotaje
 l'eka.
- Iphe, kparu iya nu buru iphe-eji,
 anyi meshiru.
- Ephe gude anyibedua;
 me eku anyi eme iphe,
 du phe ree.
- Anyi nokwa l'oke iphe-ehuka!”

Ndu byaru ẹka l'ẹkwo ọgbandzu

³⁸“Ọ kwa iphe ono meru g'o gude anyi nọdu agba ọgbandzu-a, geru egeru-a; bya edekwa iya phọ edede l'ẹkwo gẹ ndu-ishi anyi; mẹ ndu Lívayi anyi; mẹ ndu-uke Chileke anyi mee ya iphe-ọhubama.”

10 ¹Ndu meru iphe-ọhubama l'ẹkwo ọgbandzu ono bu: ọchi-ọha, bu Nehemaya nwa Hakalaya; mẹ Zedekaya; ²mẹ Seraya; mẹ Azaríya; mẹ Jieremaya; ³mẹ Pashọ; mẹ Amaraya; mẹ Malukayíjia; ⁴mẹ Hatushi; mẹ Shebanaya; mẹ Maluku; ⁵mẹ Harimu; mẹ Meremotu; mẹ Obedaya; ⁶mẹ Danẹlu; mẹ Ginetonu; mẹ Baruku; ⁷mẹ Meshulamu; mẹ Abáyijia; mẹ Mijiaminu; ⁸mẹ Mazaya; mẹ Biligayi; mẹ Shemaya. Ndu ono bukota ndu-uke Chileke.

⁹Ndu kẹ Lívayi bu: Jieshuwa nwa Azanaya; mẹ Binuyi, bu onye shi l'eri Henadadu; mẹ Kadumelu; ¹⁰mẹ ụnwunna phẹ, bu Shebanaya; mẹ Hodaya; mẹ Kelita; mẹ Pelaya; mẹ Hananu; ¹¹mẹ Mayíka; mẹ Rehobu; mẹ Hashabaya; ¹²mẹ Zaku; mẹ Sherebaya; mẹ Shebanaya; ¹³mẹ Hodaya; mẹ Bani; mẹ Beninu.

¹⁴Ndu-ishi ndu Ízurelu, mekwarupho iphe-ọhubama l'ẹkwo ọgbandzu ono bu: Paroshi; mẹ Pahatu-Mówabu; mẹ Elamu; mẹ Zatu; mẹ Bani; ¹⁵mẹ Buni; mẹ Azugadu; mẹ Bebayi; ¹⁶mẹ Adonijia; mẹ Biguvayi; mẹ Adinu; ¹⁷mẹ Ateya; mẹ Hezekáya; mẹ Azuru; ¹⁸mẹ Hodaya; mẹ Hashumu; mẹ Bezayi; ¹⁹mẹ Harifu; mẹ Anatotu; mẹ Nebayi; ²⁰mẹ Magupiyashi; mẹ Meshulamu; mẹ Heziru; ²¹mẹ Meshezabelu; mẹ Zadoku; mẹ Jiaduwa; ²²mẹ Pelataya; mẹ Hananu; mẹ Anaya; ²³mẹ Hosiya; mẹ Hananaya; mẹ Hashubu; ²⁴mẹ Haloheshi; mẹ Piliha; mẹ Shobeku; ²⁵mẹ Rehumu; mẹ Hashabuna; mẹ Maseya; ²⁶mẹ Ahaya; mẹ Hananu; mẹ Ananu; ²⁷mẹ Maluku; mẹ Harimu; mẹ Bana.

Ọgbandzu, a gbaru

²⁸Ndu Ízurelu ọzo, phoduru nu; mẹ ndu-uke Chileke; mẹ ndu Lívayi; mẹ ndu nche-onu-oguzo; mẹ ndu aguje ebvu; mẹ ndu eje ozi l'eze-ulo Chileke; mẹ iphe, bu ndu gude k'ekemu Chileke ono bufu onwophe l'ehu ndu ọhozo; mẹwaro unyomu phẹ; mẹ unwu phẹ unwoke; mẹ unwada phẹ, bu ndu ọphu iphe edowa ẹnya; ²⁹tuko g'ephe ha tsoru unwunna phẹ; mẹ ndu a maru epha phẹ kporu enwa kpua onwophe; ria nte l'ephe a-nodu eme ekemu Chileke; mbu ekemu ono, Chileke shi l'ẹka Mosisu, bu nwozi iya tua; teme l'ephe a-nodu eme iphe, Chipfu, bu Nnajiuphu suru g'e meje; meje omelali iya; mẹ iphe, ọ toru okpa iya.

³⁰“Anyi nọdu ekwe ukwe l'anyi tee kuduru unwada anyi kee ndu ali ọzo; ọphu anyi ta alutaduru unwu anyi unwoke unwada nkephe.

³¹“Ọ -buru lẹ ndu ali ọzo bẹ wobataru ngwaswa phẹ; mẹ ereshi phẹ bya erere l'eswe atuta unme bẹ anyi ta azudu phẹ aswa l'eswe-atuta-unme;

ozoo mbọku ozo, ɗu nsọ. Apha k'esa a bẹ anyi taa kọdu alì akọko; tẹme iphe, bu ugwo, e ji anyi ejiji bẹ anyi a-hakotaje g'ọ laa kẹ mmanu.

³²“Iphe ozo, anyi kwetaru l'anyi a-nodu eme bu l'aphagapha bẹ anyi e-wotaje mkpola-ochaa, ɛrwa iya ɗu nkereto shekelu bya anu g'e gude eje ozi, ɗu l'ulo Chileke anyi. ³³Mbu g'e gudeje iya zuta iphe, e gude eme buredi, eedobejeru Chileke nsọ; gude iya zuta iphe, e gude egwe ngwejanri, eegweje tekenteke; me iphe, e gude egwe ngweja-akpo-oku, eegweje tekenteke; me iphe, e gude egwe ngweja, eegweje leswe-atuta-unme; me ophu eegweje l'obo onwa ophuu; me l'obo-iphe ozo, bu obo-iphe, geru egeru; me ngweja ozo, ɗu nsọ; me kẹ ngweja-iphe-eji, e gude apfu ugwo iphe-eji, ndu Izurelu meshiru; mewaro iphe, bukpo ozi, eeje ejeje l'ulo Chileke anyi.

³⁴“Anyibe ndu-uke Chileke; me ndu Livi; me ndu Izurelu mmanu bẹ tɔakwaru ido gude gbaa g'ee-shije akpa nku, e wobata l'ulo Chileke anyi aphagapha. A gbaru akpa nku obu l'anya-unuphu l'anya-unuphu; tubukwaapho teke aa-kpataje iya; mbu nku, e gude akpo ngweja oku l'oru-ngweja Chipfu, bu Chileke anyi; egube ono, e deru iya lekemu ono.

³⁵“Akpuru-iphe-mbu, shi l'iphe, anyi meberu l'ali; yele akpuru mbu oshi-omi anyi mitaru bẹ anyi e-wobataje l'ulo Chipfu aphagapha.

³⁶“Nokwapho g'anyi e-kutaje okpara l'unwoke, a nwuru anyi; kpata anu, bu ivuzo leswi anyi; me aturu anyi; me egwu anyi; gude je l'ulo Chileke anyi; je anu ndu-uke Chileke, bu ndu eje ozi l'ulo Chileke anyi ono; egube ono, e deru iya lekemu ono.

³⁷“Anyi e-wotakwapho ereshi mbu anyi, e gweru egwegwe; yele iphe ozo, gbaru g'anyi nu Chileke; ɗu g'akpuru mbu, oshi-omi anyi mitaru; yele me ophuu anyi; me manu; je anu ndu-uke Chileke g'e dobegbaa l'ulo, aakwakobeje iphe l'ulo Chileke. Anyi e-wota oke-lanu-l'uzo-iri l'iphe, anyi metaru l'ali nu ndu Livi; noo kele o ndu Livi bẹ anakoje oke-lanu-l'uzo-iri le mkpukpu le mkpukpu aka aakobeje iphe. ³⁸Onye uke Chileke, bu onye shi l'eri Eronu bẹ a-noduje swiru ndu Livi ono m'ephe nakoje oke-lanu-l'uzo-iri ono. Ndu Livi ono e-shi l'ime oke-lanu-l'uzo-iri ono, ephe nakoru ono wofuta oke-lanu-l'uzo-iri je edobe l'ulo, aakwakobeje iphe l'ulo-eku, ɗu l'ulo Chileke anyi. ³⁹Ndu Izurelu me ndu Livi bẹ atuje ereshi; me me ophuu; me manu wobata l'ulo, aakwakobeje iphe, bu aka ivu k'eze-ulo Chileke aduje; me l'eka ndu-uke Chileke, leje ozi teke ono anoduje; me aka ndu nche-onu-oguzo; me ndu aguje ebwu anoduje; mbu l'anyi taa haedu ulo Chileke anyi.”

Ndu byaru eburu le Jierusalemu

11 ¹Teke ono bu ndu-ishi ndu Izurelu bu le Jierusalemu. Ndu Izurelu ophuna bya atua ido gude hota ndu e-je eburu le Jierusalemu, bu mkpukpu, ɗu nsọ ono. O buru onye lanu bẹ ephe ahotaje l'ime umadzu iri;

ɛphe ahaa tete ɔphuu g'ɛphe buru lɛ mkpɔkpu pɛ. ²Ndu kweru wofuta onwophe l'ɛphe e-buru lɛ Jierúsalem bu ɛ ndu Ízurelu jaru àjàjà. ³Ndu ɔwaa bu ndu ɔphu bu ndu-ishi mkpɔkpu lɛ ndu ɔphu bu lɛ Jierúsalem; obenu lɛ ndu ɔphuu, bu iya bu ndu Ízurelu; mɛ ndu-uke Chileke; mɛ ndu Lívayi; mɛ ndu eje ozi l'eze-ɔlo Chileke; mɛ oshilokpa ndu ejeru Sólomɔnu ozi bɛ onyenɔnu l'ɛhu l'ɛhu bukɔta l'alì k'ɛka iya lɛ mkpɔkpu pɛ l'alì Jiuda. ⁴Oshilokpa Jiuda mɛ oshilokpa Benjiaminu bɛ haru buru lɛ Jierúsalem.

Ndu ɔphu bu oshilokpa Jiuda, bu lɛ Jierúsalem bu: Ataya; Ataya bu nwa Uzàya; Uzàya buru nwa Zekaraya; Zekaraya buru nwa Amaraya; Amaraya buru nwa Shefatiya; Shefataya buru nwa Mahalalɛlu, bu onye shi l'eri Pɛrezu.

⁵Tɛmɛ waa Maseya; Maseya bu nwa Baruku; Baruku buru nwa Kɔlu-Hoze; Kɔlu-Hoze buru nwa Hazaya; Hazaya buru nwa Adaya; Adaya buru nwa Jioyaribu; Jioyaribu buru nwa Zekaraya, bu onye shi l'eri Shilo.

⁶Oshilokpa Pɛrezu, bu lɛ Jierúsalem bu tɔkoru du unu l'ɔkporo ɛto l'umadzu ɛsato; bukotaru mkparawa.

⁷Ndu bu oshilokpa Benjiaminu, bu lɛ Jierúsalem bu: Salu; Salu bu nwa Meshulamu; Meshulamu buru nwa Jiowedu; Jiowedu buru nwa Pedaya; Pedaya buru nwa Kolaya; Kolaya buru nwa Maseya; Maseya buru nwa Itiyɛlu; Itiyɛlu buru nwa Jieshaya.

⁸A bya eyeru iya unwunna Salu pɛ, bu Gabayi; mɛ Salayi.

Iphe, ɛphe tɔkoru du bu unu labo l'ɔkporo ishii l'umadzu ɛsato. ⁹Onye bu onye-ishi pɛ bu Jiowɛlu; nwa Zikiri; Jiuda, bu nwa Hasenuwa buru onye etsota onye-ishi lɛ mkpɔkpu ono.

¹⁰Ndu uke Chileke, bu lɛ Jierúsalem ono bu: Jiedaya nwa Jioyaribu; mɛ Jiakinu; ¹¹mɛ Seraya nwa Hilikiya; Hilikaya buru nwa Meshulamu; Meshulamu buru nwa Zadoku; Zadoku buru nwa Merayotu; Merayotu buru nwa Ahitubu, bu onye-ishi l'ɔlo Chileke. ¹²A bya eyeru iya unwunna pɛ, bu ndu eje ozi l'eze-ɔlo Chileke. Iphe, ɛphe tɔkoru du bu unu labo l'ɔkporo umadzu l'umadzu labo.

Onye ɔzo bu Adaya nwa Jierohamu; Jiehoramu buru nwa Pelalaya; Pelalaya buru nwa Amuzi; Amuzi buru nwa Zekaraya; Zekaraya buru nwa Pasho; Pasho buru nwa Malukayijia. ¹³A bya eyeru iya unwunna iya, bukota ndu-ishi l'ɛnya-unuphu ibe nna pɛ. Iphe, ɛphe tɔkoru du buru ɔkporo iri l'ɛbo l'umadzu labo.

Onye ɔzo bu Amashayi nwa Azarɛlu; Azarɛlu buru nwa Ahuzayi; Ahuzayi buru nwa Meshilemotu; Meshilemotu buru nwa Ima. ¹⁴A bya eyeru iya unwunna iya ndu bukota mkparawa. Iphe, ɛphe tɔkoru du bu ɔkporo ishii l'umadzu ɛsato. Onye-ishi pɛ bu Zabudɛlu nwa Hagedolimu.

¹⁵Ndu Lívayi, bu lɛ Jierúsalem bu: Shemaya nwa Hashubu; Hashubu buru nwa Azurikamu; Azurikamu buru nwa Hashabaya; Hashabaya buru nwa Buni.

¹⁶Ndu ọzo bụ: Shabetayi yẹle Jiozabadu, bụ ndu-ishi ndu Lívayi mbụ ndu eleta ẹnaya l'ozì, eje l'azu ụlo Chileke.

¹⁷Onye ọzo bụ: Matanaya nwa Mayịka; Mayịka buru nwa Zabudi; Zabudi buru nwa Asafu, bụ onye-ishi ebvu-ekele; mę epfu anụ Chileke.

Bakubukaya bụ onye k'ẹbo l'ụnwunna Matanaya.

Onye ọzo bụ Abuda nwa Shamuwa; Shamuwa buru nwa Galalu; Galalu buru nwa Jiedutunu.

¹⁸Ndu Lívayi, bu lę mkpukpu ono, dụ nsọ ono bę tukuru dụ ukporo iri l'eno l'umadzu eno.

¹⁹Ndu nche-ọnu-oguzo, bu lę Jierúsalemụ bụ: Akubu; mę Talumonu; mę ụnwunna phe, bụ ndu anọduje eche nche l'onu-oguzo. Iphe, ephe dụ bụ ukporo esato l'umadzu iri l'ẹbo.

²⁰Ndu Ízurelu ọzo, phoduru nụ; mę ndu-uke Chileke; mę ndu Lívayi ọzo, bụ ndu phoduru nụ bę bukota lę mkpukpu lę mkpukpu, nọgbaa l'ali Jiuda. Onyenonu bugbaa l'oke alị nkiya. ²¹Ndu eje ozi l'eze-ulo Chileke buru l'eli úbvú Ofelu. O buru Ziha yẹle Gishipa bụ ndu-ishi ndu ono, eje ozi l'eze-ulo ono.

²²Ndu bụ ndu-ishi ndu Lívayi ono, bu lę Jierúsalemụ bụ: Uzi nwa Bani; Bani bụ nwa Hashabaya; Hashabaya buru nwa Matanaya; Matanaya buru nwa Mayịka, bụ onye shi l'eri Asafu. Eri Asafu bę bụ ndu-ishi ebvu, aagu agugu l'eze-ulo Chileke. ²³Ephebe ndu aguje ebvu ono bę eze turu ekemu swiberu; o buru iya anọduje egoshi iphe, ephe a-nodu eme mboku-mboku.

²⁴Onye nọ-chiru ẹnaya ndu Ízurelu l'iphu eze bę bụ Petahaya nwa Meshazelu; mbụ onye shi l'eri Zera nwa Jiuda.

Ndu Ízurelu, bu lę mkpukpu, ta abudu Jierúsalemụ

²⁵A bya l'ụnwu mkpukpu ọzo mę egu, dụ iya nụ; ụnwu Jiuda bę haru buru lę Kiriya-Araba; mę ụnwu mkpukpu, dukota iya nụ. Ephe hakwarupho buru lę Dibonu mę ụnwu mkpukpu, dukota iya nụ; mę Jiekabuzelu mę ụnwu mkpukpu, dukota iya nụ. ²⁶Ephe buru lę Jieshuwa; mę Molada; mę Betu-Peletu; ²⁷mę Haza-Shuwalu; mę Biye-Sheba; yẹle ụnwu mkpukpu, dukota iya nụ; ²⁸mę lę Zikulagu; mę Mekona; yẹle ụnwu mkpukpu, dukota iya nụ; ²⁹mę lę Enu-Rimonu; mę Zora; mę Jiarumutu; ³⁰mę Zano-wa; mę Adulamu; yẹle ụnwu mkpukpu, dukota iya nụ; mę lę Lakishi; yẹle egu, nokota iya nụ; mę lę Azeka yẹle ụnwu mkpukpu, dukota iya nụ. Oo ya bụ l'ephe bu e -shi lę Biye-Sheba jeye lę nsuda Hınomu.

³¹Oshilokpa Benjiaminu bę shi lę Geba bua kwaseru; ephe bu lę Mikumashi; mę Ayijia; mę Betelu; yẹle ụnwu mkpukpu, dukota iya nụ; ³²mę lę Anatotu; mę Nobu; mę Ananaya; ³³mę Hazo; mę Rama; mę Gitayimu; ³⁴mę Hadidi; mę Zebowimu; mę Nebalatu; ³⁵mę Lodu; mę Ono; yẹle nsuda "Nsuda ndu eme ona." ³⁶Ndu Lívayi, bụ ndu ephe l'ipfu Jiuda shi buru bę a haru keru yeru ipfu Benjiaminu.

Ndu uke Chileke waa ndu Lívayi

12 ¹Waa ndu-uke Chileke; me ndu Lívayi, epe le Zerúbabelu nwa Sheyalutiyelu; me Jieshuwa swi shi l'eka a kpuru phe le ndzu lwa baa: Seraya; me Jieremaya; me Ezura; ²me Amaraya; me Maluku; me Hatushi; ³me Shekanaya; me Rehumu; me Meremotu; ⁴me Ido; me Ginetoyi; me Abáyijia; ⁵me Mijiaminu; me Madaya; me Biliga; ⁶me Shemaya; me Jioyaribu; me Jiedaya; ⁷me Salu; me Amoku; me Hilikaya; me Jiedaya. Ndu ono shi bukotaru ndu-ishi ndu-uke Chileke; buru ishi unwunna phe teke Jieshuwa bu ishi.

⁸Ndu ke Lívayi bu: Jieshuwa; me Binuyi; me Kadumelu; me Sherebaya; me Jiuda; me Matanaya. O buru Matanaya ye le unwunna iya be bu ndu kebvu-ekele du l'eka.

⁹Unwunna phe, bu Bakubukaya; ye le Uni buru ndu anoduje ekweru phe ebvu ono.

Eri Jieshuwa, bu onye-ishi ndu-uke Chileke

¹⁰Jieshuwa bu nna Jioyakimu; Jioyakimu buru nna Eliyashibu; Eliyashibu buru nna Jioyada; ¹¹Jioyada buru nna Jionatanu; Jionatanu buru nna Jiaduwa.

Ndu-ishi l'anya-unuphu ndu-uke Chileke

¹²Ndu shi buru ishi l'anya-unuphu ndu-uke Chileke le teke Jioyakimu bu ishi bu:

Onye-ishi ke anya-unuphu Seraya bu Meraya.

Onye-ishi ke anya-unuphu Jieremaya buru Hananaya.

¹³Onye-ishi ke anya-unuphu Ezura buru Meshulamu.

Onye-ishi ke anya-unuphu Amaraya buru Jiehohananu.

¹⁴Onye-ishi ke anya-unuphu Maluki buru Jionatanu.

Onye-ishi ke anya-unuphu Shebanaya buru Jiósefu.

¹⁵Onye-ishi ke anya-unuphu Harimu buru Aduna.

Onye-ishi ke anya-unuphu Merayotu buru Helukayi.

¹⁶Onye-ishi ke anya-unuphu Ido buru Zekaraya.

Onye-ishi ke anya-unuphu Ginetonu buru Meshulamu.

¹⁷Onye-ishi ke anya-unuphu Abáyijia buru Zikiri.

Onye-ishi ke anya-unuphu Minyaminu ye le ke Mowadaya buru Pilitayi.

¹⁸Onye-ishi ke anya-unuphu Biliga buru Shamuwa.

Onye-ishi ke anya-unuphu Shemaya buru Jiehonatanu.

¹⁹Onye-ishi ke anya-unuphu Jioyaribu buru Matenayi.

Onye-ishi ke anya-unuphu Jiedaya buru Uzi.

²⁰Onye-ishi ke anya-unuphu Salayi buru Kalayi.

Onye-ishi ke ɛnya-unuphu Amọku buru Eba.

²¹ Onye-ishi ke ɛnya-unuphu Hilikaya buru Hashabaya.

Onye-ishi ke ɛnya-unuphu Jiedaya buru Netanęlu.

Edeshi ępha ndu-uke Chileke waa ke ndu Lívayi l'ękwo

²² Teke ęliyashibu bu ishi; me Jioyada; me Jiohananu; me Jiaduwa be e dekotaru ępha ndu-ishi ndu Lívayi; me ke ndu-ishi ndu-uke Chileke l'ękwo; ępha ono be e deru teke Dariyosu bu eze ndu Peshiya.

²³ Unwu Lívayi, bu ndu-ishi l'ęnya-unuphu ibe nna phe be e dekotaru ępha phe l'ękwo, e deshuru iphe, e meru teke ono. ępha ono be e deru je-ye teke ke Jiohananu, bu nwa ęliyashibu.

Ekeshi ozi eze-ulo Chileke

²⁴ Ndu-ishi ndu Lívayi bu: Hashabaya me Sherebaya; me Jieshuwa, bu nwa Kadumelu. Unwunna phe be apfujeru ghaaru phe iphu; agu ebvu-ajaja yele ebvu-ekele. Teke ndu ophuu guru iya; ndu ophuu ekwee ya ekwekwe ęgube ono, Dévidi, bu onye ke Chileke toru phe okpa iya.

²⁵ Matanaya; me Bakubukaya; me Obedaya; me Meshulamu; me Talu-monu; me Akubu be bu ndu nche, anoduje eche nche l'ulo, eedobeje iphe l'onu-abata eze-ulo Chileke.

²⁶ Ndu ono be jeru ozi le teke ke Jioyakimu nwa Jieshuwa; mbu nwa-nwa Jiozadaku; me teke ke Nehemaya, bu ochi-oha; mekwapho teke ke ęzura, bu onye uke Chileke bya aburu onye edeje ękwo.

Eye igbulo Jierusalęmu l'ęka Chileke

²⁷ O be teke ee-woru igbulo Jierusalęmu ono ye l'ęka Chileke; a cho ndu Lívayi jekota l'ękameka, ęphe bu; g'ęphe byakota Jierusalęmu bya egude ęhu-utso; me ebvu-ekele; ku ogena; kpo une; me ogelenda; gude woru igbulo ono ye l'ęka Chileke. ²⁸ Ndu Lívayi, bu ndu ogbo-ebvu ono shi l'iphe, bu ali, no-pheru Jierusalęmu mgburugburu; me unwu mkpu-kpu, du le Netofa tuko dzukobe. ²⁹ Ndu ophu shi le Betu-Giligalu; me l'uzo Geba; me Azumavetu dzukotaru; kele ndu ogbo-ebvu ono be metaru mkpu-kpu buphee Jierusalęmu mgburugburu. ³⁰ Ndu uke Chileke me ndu Lívayi doo onwophe nsọ; bya edokwaapho ndu ęzurelu nsọ; bya edoo onu-abata Jierusalęmu yele igbulo ono nsọ.

³¹ Teke ono be mu byaru eduta ndu-ishi ndu Jiuda; ęphe nyihu eli igbulo ono. Mu bya agbaa uzi ndu ebvu labo, hagbaa shi, bu ndu a-nodu agu ebvu-ekele.

Uzi lanu wuru shia eli igbulo ono uzo ękutara futu le Onu-abata Ikpọ-zu. ³² Ndu letso phe lazụ bu Hoshaya yele nkeru-ebo ndu-ishi ndu Jiuda; ³³ me Azarıya; me ęzura; me Meshulamu; ³⁴ me Jiuda; me Benjiaminu; me Shemaya; me Jieremaya; ³⁵ me ndu ozo, shi l'eri ndu-uke Chileke,

chigbaa opu; mekwapho Zekaraya, bu nwa Jionatanu; Jionatanu bu nwa Shemaya; Shemaya buru nwa Matanaya; Matanaya buru nwa Mayikaya; Mayikaya buru nwa Zaku; Zaku buru nwa Asafu; ³⁶ yee unwunna iya, bu Shemaya; me Azarelu; me Milalayi; me Gilalayi; me Mayi; me Netanelu; me Jiuda; me Hanani. Ephebedua be gude ududu ngwa-ebvu, Dévidi, bu onye ke Chileke suru g'e gudeje. O buru Ezura, bu onye edeje ekwo be vutaru phe uzo. ³⁷ Ephe rwuepho Onu-abata Enya-nwobvu; ephe kwaseru je enyikota aka eeshije enyiba le mkpukpu Dévidi; mbu me a -nodu enyikota igbulo ono enyikota. Ephe kwaseru eli igbulo ulo Dévidi ono futa le Onu-Abata-Mini, no l'uzo enyanwu-awawa.

³⁸ Ndu ebvu ophunapho wuru shia uzo ekicha. Mbedua me nkeru-ebonu Izurelu nodu etso phe l'azu l'eli igbulo ono. Anyi shi l'ulo-ephekerephe Otapfupfufu-oku futa le Igbulo-osa. ³⁹ Anyi shi l'eka ono wuru je aghaa Onu-abata Ifuremu; me Akahu Onu-abata; me Onu-abata Ema; me Ulo-ephekerephe Hananelu; me Ulo-ephekerephe, aza Ukporo-ise; shi nno futa le Onu-abata Aturu. O buru l'onu-abata Nche be ephe jeberu.

⁴⁰ Ndu ogbo-ebvu labo ono, aguje ebvu-ekele ono bya anodu l'onodu phe l'ulo Chileke. Mbedua me nkeru-ebonu ndu-ishi ono nodukwapho l'onodu k'anyi. ⁴¹ Ndu uke Chileke, bu Eliyakimu; me Maseya; me Minyaminu; me Mayikaya; me Eliyowenayi; me Zekaraya; me Hananaya nodu l'onodu nkephe pagbaarū opu l'eka. ⁴² Ndu ozo bu Maseya; me Shemaya; me Ele-yaza; me Uzi; me Jiehohananu; me Malukayijia; me Elamu; me Eza. Ndu ebvu ono wata agu ebvu; onye bu ishi ebvu phe buru Jiezurahaya.

⁴³ Mboku ono be ephe gweru ngweja, paru aka apaa; ehū tsoo phe utso; noo kele Chileke be meru g'ehu tsoo phe utso shii. Unwanyi me unwegirima tuko ete eswa. A -gbē l'eka du enya anu uzu ehū-utso, aatu le Jierusalemu.

Iphe, a nuru g'e gude baaru Chileke eja l'ulo iya

⁴⁴ O buru mboku ono be a hotaru ndu a-nodu eletaje enya l'ulo, eedobeje iphe, a turu atutu; me akpuru-iphe-mbu; me oke-lanu-l'uzo-iri. Ndu ono e-shije l'opfu, a kokotaru le mkpukpu ono mgburugburu wobata iphe bya edobe l'ulo ono, eedobeje iphe ono egube ekemu suru g'e mejeru iya ndu-uke Chileke me ndu Lívayi. Kele ndu-uke Chileke; me ndu Lívayi ono, eje ozi ono meru; ehū nodu atso ndu Jiuda utso. ⁴⁵ Ephe eje ozi Chileke phe; bya eje ozi k'asafu nturuwu; egube ono, ndu ebvu me ndu nche-onu-oguzo ejekwapho ozi, rwuberu phe nu; egube ono, Dévidi me nwa iya, bu Sólo-monu suru g'e meje iya. ⁴⁶ Noo kele teke Dévidi me Asafu no ndu; mbu teke ndiche be e shi nweru ndu-ishi ndu ebvu; nweru ebvu, e gude aja Chileke ajaja; me ebvu, e gude ekele iya ekele. ⁴⁷ Teke Zerúbabelu yee Nehemaya bu ishi be ndu Izurelu g'ephe ha ewotaje iphe, rwuberu ndu ebvu me ndu nche-onu-oguzo nu phe mboku-mboku. Nokwapho g'ephe edobeje iphe nsō nu ndu Lívayi; ndu Lívayi edobe iphe nsō nu oshilokpa Erōnu.

Ebufu ndu ọhozo l'ẹka ndu Ízurelu nọ

13 ¹Mbọku ono bẹ ẹphe gūru iphe, e deru l'ẹkwo Mósísu; ndu Ízurelu nọma-dzuru iya. Iphe, a guvuru l'ẹkwo ono bụ g'ọ tọ ụkwa onye Amọnu; ọzoo l'ọo onye Mówabu e-je abata l'ẹka ndibe Chileke dzukọberu; ²noo kele ẹphe te gudedu nri mę mini gba ndu Ízurelu ndzuta; ọ buchiaru Belamu bẹ ẹphe butaru g'ọ bya bya atua pẹ ọnu. Ọ tọ bụ lẹ Chileke anyi gharu ọnu ono ighaphu; ọ buru ọnu-ọma. ³Ọo ya bụ; ndu Ízurelu nọmaepho iphe, ekemu ono pfuru; ẹphe bufukọta ndu shi l'ọhozo l'ẹka ndu Ízurelu nọ.

Nehemaya edozi iphe

⁴Tẹmanu iphe ono mee bẹ Eliyashibu, bụ onye uke Chileke; mbụ onye a tūru ẹka g'ọ buru onye-ishi ẹka eedobeje iphe l'eze-ulo Chileke; bẹ yele Tobaya dū lẹ ree shii. ⁵Eze mkpuru ono, e shi edobeje ngweja-nri; mę ụnwù-isensu; mę ivu, e gude eje ozi l'eze-ulo Chileke; mę oke-lanụ-l'uzo-iri k'ereshi; mę ke mę; mę ke manụ, aasuje g'e wotaru ndu Lívayi; mę ndu ebvu; mę ndu nche-ọnu-oguzo; mbụ mkpuru ono, e shi edobeje iphe, a tūru utu nū ndu-uke Chileke bẹ Eliyashibu nūru Tobaya. ⁶Teke ono, iphe ono eme ono bẹ mu ta nọdu lẹ Jierúsalemụ. Noo kele apha, kwe Atakuzakuzesu ụkporo apha l'apha iri l'ẹbo, e meru iya eze ndu Bábilonu bẹ mu laphuru azụ l'ibe eze. A nọepho nwanshii; mu rwo eze g'ọ haa mu gę mu lashia. ⁷Mu bya alwarwuta Jierúsalemụ bya ahuma ejo-iphe ono, Eliyashibu meru l'opfu ẹhu Tobaya ono; mbụ anunu ono, ọ nūru iya mkpuru, dū l'eze-ulo Chileke o buru ono. ⁸Iphe ono ghushikpo mu egbu ike; mu chitakota ivu ulo, bụ ke Tobaya, nọ lẹ mkpuru ono; tuphashia l'etezi. ⁹Mu bya akaru; a bya emechaa mkpuru ono emecha; mu bya egwetakota ivu, eegudeje eje ozi l'ulo Chileke bya edobephu azụ l'ẹka ono; mę ngweja-nri; mę ụnwù-isensu.

¹⁰Mu bya amakwarupho l'a taa nujedu ndu Lívayi iphe, rwuberu pẹ nū; o mee k'ophu bụ lẹ ndu Lívayi; mę ndu l'aguje ebvu, bụ ndu l'eje ozi l'eze-ulo Chileke ono bẹ gbakashihuru nū; onyenonu kọahaa opfu iya. ¹¹Ọo ya bụ mu baaru ndu-ishi mba sụ pẹ: “?Bụ gunu meru g'ọ gude a parụ eze-ulo Chileke gbado egube-a?” Mu bya achikobe ndu Lívayi; mę ndu ono, aguje ebvu ono dobephu pẹ azụ l'onodu pẹ. ¹²Ọ buru teke ono bẹ ndu Jiuda l'opfu wobataaharu oke-lanụ-l'uzo-iri, shi l'ereshi; mę mę; mę manụ l'ulo, eedobeje iphe. ¹³Ndu mu tūru ẹka g'ẹphe buru ndu-ishi ulo ono, eedobeje iphe ono bụ: Shelemaya, bụ onye uke Chileke; mę Zadoku, bụ onye edeje ẹkwo; mę onye Lívayi, ẹpha iya bụ Pedaya. Onye mu hotaru swibe pẹ g'ọ yejeru pẹ ẹka bụ Hananu nwa Zaku; buru nwanwa Matanaya; noo kele ndu ono bẹ a guru lẹ ndu e gude ire pẹ ẹka. Ozi pẹ bụ g'ẹphe kejeru unwanwa pẹ iphe.

14 “Gùbe Chileke mu; nyatakwa mu rọọ ya l'iphe-a, mu meru-a. Be huchafúkwa iphe, dù ree, mu megbabèru eze-ùlo gùbe Chileke mu; mę l'ozì, eeje l'ẹka ono.”

15 Teke ono bę mu hụmaru ndu nọ lę Jiuda azọshi męe l'akpuru vayinu l'eswe-atùta-unme; gude nkafụ-ìgara evubatabaa ereshi; mę męe; mę akpuru vayinu; mę akpuru figu; mę ivu ọzo, dù iche iche. Ẹphe nọdu evu iya ala lę Jierúsalemu l'eswe-atùta-unme. Mu lọọ phę ẹka lę nchì g'ẹphe haa ere nri lę mbọku ono. 16 Ndu Taya, bụ ndu bukwaphọ lę Jierúsalemu bę evubataję ẹma; mę ngwaswa ọzo, dù iche iche ere ndu Jiuda lę Jierúsalemu l'eswe-atùta-unme. 17 Oo ya bụ; mu baaru ndu a maru ẹpha phę lę Jiuda mba sụ phę: “?Ejo-iphe ọwa, unu eme-a bụ gunu; kę g'unu merwushi eswe-atùta-unme? 18 ?Tọbudu ẹgube iphe ono bę nna unu phę meru; meru iphe, Chileke anyi meru g'ejo iphe-ẹhuka-a dapfuta anyi waa mkpukpu-a? Unu byakwa nta-a bya awata emerwushi eswe-atùta-unme; shi nno eme g'oke ẹhu-eghu Chileke kabaa azụpabe ndu Ízuru.”

19 O be l'uzo nchi-ẹjihu lę mbọku, bụ nchitabọhu iya a-buru eswe-atùta-unme; mu tųa ekemu sụ g'a gbachishikọta mgbo ọnu-abata Jierúsalemu; sụkwapho g'a ta gụhakwa iya agụha jeye eswe-atùta-unme a-bvụada. Tęme mu haru ndu-ozì mu dokachaa l'ọnu-abata ono g'ọ tọ dushi ivu, ee-vubata l'eswe-atùta-unme ono. 20 Ndu nghọ; mę ndu ere ngwaswa, dù iche iche kwachaa akwakwa l'azu Jierúsalemu ugbo lanu; ọzoo ugbo ẹbo. 21 Mu bya alọru phę ẹka lę nchì sụ phę: “?Bụ gunu meru g'ọ gude unu nọdu akwaję l'azu igbulọ ono? Unu -mebaa ya ọzo bę mu a-dakwa unu ẹka.” Shita teke ono kwaseru bę ẹphe byabuhuru l'eswe-atùta-unme. 22 Mu sụ ndu Lívayi g'ẹphe sachaa onwophe asacha je anọdu cheje nche l'ọnu-abata ono; k'ọphu ee-dobe eswe-atùta-unme ono nsọ.

Nyatakwa mu phọ l'iphe-a, mu meru-a; gùbe Chileke mu. Guderọ n-ye-mobu ngu ono, parụ ẹka ono phuru mu obu-imemini.

23 Lę teke ono bę mu hụmakwarupho ndu Jiu, lushiru unwanyi, shi lę Ashidodu; mę lę Amonu; mę lę Mówabu. 24 Nkerębo l'unwegirima phę nọdu epfu opfu ndu Ashidodu; ọzoo opfu ndu ibiya nkephe; ọphu ẹphe ta amadu g'epfu opfu-alì ndu Jiu. 25 Mu bya abaarụ phę mba tųa phę ọnu. O nweru ndu ọphu mu chiru iphe; lashia phę egbushi l'ishi. Mu sụ phę g'ẹphe gude ẹpha Chileke ria nte sụ: “Anyi ta abyadu e-kuta unwada anyi kee unwu phę nwoke; ọphu anyi ta abyadu alutaru unwu anyi unwoke unwada phę; ọphu anyi ta alutadu phę k'onwanyi. 26 ?Tọ bụnaa k'unwanyi, dù nno bę Sólomonu, bụ eze ndu Ízuru gude mee iphe-ẹji tọ? L'ohamoha bę ta adukwa eze ọzo, dù gę yebedua. Tęme ọ buru onye Chileke iya yeru obu; Chileke mee ya g'ọ buru eze ndu Ízuru l'ọphu. Obenu l'ọọ unwanyi ọhoro bę kpataleru-a o mee iphe-ẹji. 27 ?O dù ree g'anyi gude nchì anyi numa l'unu l'eme ejo-iphe, ha ẹgube-a; mbụ l'unu lushiru unwanyi ọhoro; shi nno buru ndu mesweru Chileke anyi tọ?”

²⁸Onye lanu l'unwu Jioyada; nwa Eliyashibu, bu onye-ishi ndu-uke Chileke be bu ogo Sambalatu, bu onye Horonu. Oo ya bu; mu chifu iya g'oshi l'eka mu no lufu.

²⁹Nyatakwa phe; gube Chileke mu; noo kele ephe turwuwaru okwa ndu-uke Chileke; bya aturwua ogbandzu, gu le ndu-uke Chileke me ndu Liviayi gbaru.

³⁰Tobudu iya bu; mu safukota phe turwu, ephe chitaru lehu ndu ali ozo; bya anuchaa phe ozi, gbaru ndu-uke Chileke; me ndu Liviayi; onyenu jeahaa ozi, gbaru iya nu. ³¹Mu mekwapho g'e vutaje nku yele akpuru-ipe-mbu l'orwuberu iya.

Gube Chileke mu; nyatakwa mu ro le k'oma.